

# განთიადი

ორკვირული სამეცნიერო, სა-  
ლიტერატურო და საპოლიტიკო  
ჟურნალი.

**ზ ი ნ ა ა რ ს ი :**

1. კენა პოემები, დ. თურდოსპირელისა.
2. ლექსი, დ. თომაშვილისა.
3. საიდგომო კაბა, მოთხრობა, კირილე წუთისოფელელისა.
4. დაღუპული ოჯახი. რ. საჯავახოელისა.
5. ბაბო, მოთხრობა, გ. ებრაღიძისა.
6. რა არის ცოცხალი ორგანიზმი, ექიმი ბადრიძისა.
7. კრიტიკა, თ. თ. აკაკი წერეთელზე და ილია ქუეყაძეზე, ნ. ნიკოლაძისა.
8. ბიბლიოგრაფია, ჩარლზ დარვინი, იაკ. ფანცხავასი.
9. ახლო აღმოსავლეთი, გულკეთილისა.
10. ომის მატინე.

1 აპრილი 1915 წ.

**მ თ ა ი ს ი**

სტამბა „მშობა“ ქარვასლის ქ., სახლი ჩარეკოვისა.



# მეაბრეშუმეთა ≡ ≡ საყურათღებოთ!

მიუხედავად ომისა და საქონლის გაძვირებისა ჩვენ დიდ ძალი აბრეშუმის თესლი გამოვგზავნეთ ქუთაისში, საუკეთესო საფრანგეთის ფირმებისა, საფრანგეთის მთავრობის მიერ შემოწმებული და საფრანგეთის სამეურნო სამინისტროს ბანდეროლით კოლოფებზე, ასე რომ კავკასიის სააბრეშუმო სადგურის მიერ შემოწმება არ ქირდება, რადგან საფრანგეთის მართებლობა მართო საღს თესლს უშვებს უცხოეთში.

თითო კოლოფი შეიცავს 7 მისხალ თესლს და მისგან მოყვანილი პარკი 100/0 მეტ რანდემანს იძლევა. მსურველთ ჩვენი თესლი შეუძლიათ შეიძინონ

ქუთაისში, ისილორე კვიცარიძესთან, „იმერეთის“ კანტორაში.  
გთხოვთ დაუჩქაროთ ამ ერთათ ერთი საღი თესლის შეძენას!

პატივისცემით დავით დამაშისძე და აშს., ღონდანში.

უოველდღიური სანალიტიკო და სანალიტერბატურო გასყეთ

„სახალხო ფურცელი“

(სურათებიანი დამატებით).

წლიურათ ღირს 8 მან. 50 კ. ერთის თვით—75 კაპ.

მისამართი: Тифлисъ, газ. „Сахалхо Пурцели“ поч. ящ. № 190.

თფილისის წიზნის მაღაზიეზი იზიდვა

გ. თუმანიშვილის წიგნები:

Итоги земскихъ совѣщаній на Кавказѣ.

ფ. 60 კაპ.

Характеристика и воспоминанія,

(ქართველი და სომეხი მწერლები და სხვა მოღვაწეები. ქართული თეატრი. — რუსის მწერლები და მოღვაწეები კავკასიაში).

მეორე შევსებული გამოცემა. ფ. 50 კაპ.

ПЕРВЫЙ КАМЕНЬ

(Къ закладкѣ фундамента Тифл. Политехникума).

ფ. 15 კაპ.

ორგანიზაციული საპოლიტიკო, სალიტერატურო და სამეცნიერო ჟურნალი.

## კიკნა პოემები.

I.

### ნისლები.

ნისლები...

იის ფერი ნისლები...

როგორ კოპწიაობენ...

რა რიგ ყელ-ყელობენ...

რა ეშხიანათ ილიმებიან....

ლაღათ, მხიარულათ ბანაობენ ლაქვარდში და ისედაც ფაქიზ-  
ნი უფრო სპეტაკებიან... ისედაც ტურფანი ზღაპრულს ფერიებს  
ემსგავსებიან.

ეგრე, ეგრე ძვირფასნო!

იცინეთ, ილალობეთ...

განეწონეთ ფირუზს ცას... ეზიარეთ ლალის სხივებს...

ისარგებლეთ, სიცოცხლი გიდრე გაზაფხულია, ვიდრე მზე  
ბრწყინავს, კათაოა ძოწმენდილია...

იკოდეთ: ფრიად ხანმოკლეა ასეთი ჟამი...

ლაოკდით, დასტკბით მისხით-მისხამდი -- თორე მალე დადგება  
პირ-მქისი შემოდგომა თვისი გაუთენებელი ღამეებით, მალე წამო-  
გაქროლებთ გაავზნებული ქარი და ივა-წივით მიმოგფანტავთ მწირ  
ხევ-ხუვებში ჟინჯლიან ჯანღთან სავალალებლათ... დამქნარს  
ფოთლებთან დასახოცავათ...

ნისლებო, საყვარელო ნისლებო!..

რას გაიცრიცეთ... წითური ღიმილი რათ გაგიქრალდათ?..

შეგაკრთოთ ჩემმა სიტყვებმა?

სიკვდილისა შეგეშინდათ?..

ნუ, ნუ ინაღლებთ, ძვირფასნო... ნუ აიმღერევთ ცნობას...

ასეთია გარდუვალი ბედის-წერა.

ყველაფერი კვდება... ყველაფერი ისპობა სამუდამ-ჟამოთ...

უკვდავია მხოლოდ სიკვდილი — მარადისობის ყარ-ყუმი მუხრე...

II.

### რათა გგონიათ?..

განთიადისას, როდესაც ყვაილები, ფერად-ფერადათ გადა-  
იშლებიან, როდესაც აღმასის ცვრები თრთოლას იწყებენ მათს



მოხსნასე ფოთლებზე,—რათა გგონიათ, რო ყვაილნი იცინოდენ ლხენის სიქარბით გალადებულნი?..

რათა გგონიათ, რომ ის ცერები იყვენ ცრემლები ნეტარებისა... არა!

ისინი ჯავრისა და ვაების ცრემლებია.

ყვაილები სტირიან, ყვაილები ვაგლახობენ იმიტომ, რო ხანმოკლეა მათი სიცოცხლე; მათ იკიან, რო მალე დასქენებიან, მალე გაილესებიან საუკუნო წყვდიადსა და სიცივეში და აღარასოდეს გამეორდებიან... აღარასოდეს იხილვენ მზეს, ვარსკვლავებს, ნაკადებს, ჩიტუნებს, —ყველა იმას, რაც ხარობს და ნეტარობს, ლაღობს და კისკისობს სიცოცხლის ეშით...

დ. თურდასპირელი.

### ასე... ერთხვით!

ე მაგრე, თქვენი ქირიმე!  
ე მაგრე შეუტატანეთ—  
და თუნდ სიცოცხლევ მომთხოვეთ,  
ზე თანვე გადამატანეთ!..

გულს მოეფინა სიამე  
და შეგება იგრძნო ტანჯულომა,  
შემუშენა რომ იწყო სოროში,  
იმ ცხრაგვერდა და ცხარაჯულომა!..

იმედის სხივმა დამქროლა,  
ობლათ მიმქრალმა ეულათ,  
და განმიახლა კვლავ რწმენა  
თვის შუქით ანაზღვეულათ!..

სხვაგან მუხთლობის მძებნელი,  
ჩვეული სხვების კიცხვასა,  
ვერ დაემალვის ვეროდეს  
ერის ერთხმოვან რისხვასა!..

არც მოელოდა ვერავი  
ამ ერთხმით შეტატანებას:  
დაბალ ლობეზე გადასვლის  
მიტომ აძლიედა თავს ნებას!..

მისპინძლის ამგვარ დახვედრას,  
რომ არ ყოფილა ჩვეული,  
სახტათ, პირ-კატა-ნაცეში  
გაბრუნდა სირცხვილეული!..

სრულდება წმიდა სურვილი—  
ანდერძი წინაპარისა:  
ერთსულოვნობით ფარგება

მტრის დამცემია ზარისა!..

და, რო ვიგემეთ ნაყოფი,  
თუმცა პირველი ხილია,  
ნულარ მომაკლებთ, გეთაყვათ,  
ის იმოდენათ ტკილია!..

ე მაგრე, თქვენი ქირიმე!..  
კვლავ ეგრე შეუქაქანეთ!..  
და განგებ თგზული „სიბრიყვე“  
მტერს საფლავშიაც ანანეთ!..

დ. თომასვილი.

## სააღდგომო კაბა.

(მოთხრობა).

I.

გადატრიალდა დროთა ბრუნვის უზარმაზარი ჩარხი და თან გადაიტანა დაღვრემილ-სევდიანი ზამთარი; გაქრენ დრონი მწარენი და თან წარიტაცეს ვაება ღარიბთა... იფეთქა იამ და პირველათ მან მიახარა ქვეყანას გაზაფხულის გამარჯვება. ისუნთქა ბუნებამ და თვისი სწორუბოვარი, თანდათანობის დაცვის კანონით ნაზათ და ნაზათ გამოაღვიძა მიძინებული ქვეყანა. — „ი გაზაფხული!“ უხმოთ გასძახა ბაღმა; — „გაზაფხულია!“ მხიარულათ დასძახეს ფრინველებმა... აგერ, სიცოცხლის მომნიქებელი მზეც სალაშს უძღვნის დედა მიწას და თვისი ოქროს სხივებით



ატყობინებს: — „გიახლოვდები, გიხაროდეს, გაზაფხულიაო“. — „გაზაფხულია, გაზაფხული!“ — წამოიძახა მუშამაც და თვისი სამართებელივით ნალესი თოხი გაიქნია ქალაში, როგანადგუროს ნაყნვარზე დარჩენილი ჩაღის ღეროები, მოსწმიდოს, მოაგროვოს და გენია ცეცხლს მისცეს, რასაც მის ბრძოლის ველზე ხელის შემცარავი მნიშვნელობა აქვს, ბინდისას მწკრივ-მწკრივათ გააჩაღოს ცეცხლი და მის საყვარელ დედა მიწის ზურგზე დახატოს თვალწარმტაცი ცოცხალი სურათი მავნე, ურგებ ნივთთა განიავ ქარებისა.

ამ საზოგადო ფაქტუის ღროს, როცა უკანასკნელი მწერიც-კი ამოძრავდება ხოლმე სახლოს მოსაპოვებლათ, არც ტუტუ კაპაჩია დარჩენილიყო ფერხულს გარეშე: ისიც ხარობდა გულის გამთბობი გაზაფხულით, ხარობდა ბუნების შეგნიერებით, თან ამზადებდა საყანე მიწებს და ხარობდა მითაც, რომ ერთობ დიდძალი და ნოყიერი მიწები აელო დასამუშავებლათ... ის ღარიბი იყო და, რადგანაც საკუთარი მიწა-წყალი არ გააჩნდა, სხვის ხელში შემყურე საბრალო გლეხკაცი კმაყოფილდებოდა მითი, რასაც მიწის მეპატრონე მიუვდებდა, რომლისთვისაც წელიწადში ორისამი ქათამი დაქირდებოდა საძღვნოთ, უკეთ რომა ეთქვათ, — ქათამთ, რო მიწის მეპატრონეებს პირიდან ლუკმა არ გამოვეგლიჯა ტუტუს ოჯახისთვის. ღარიბი ტუტუც, რომელსაც არ გააჩნდა, არც ქონებრივი, არც სხვაგვარი მოხერხების ძალა, უნებურათ ჯერდებოდა იმ ყველასგან დაწუნებულ ორ-სამ ქცევა ხრიოკ მიწის, რომელიც, თუ არა ტუტუ, შეიძლება დაუმუშავებლათ დარჩენილიყო. მარა, რაკი სხვა საშვალემა მას არ გააჩნდა, ასეთ მიწებზე ღვრიდა ოფლს იმ პირობით, რო ნახევარი ნამუშევარი თვისი საკუთარი ხარჯებით მიერთმია მიწის პატრონისთვის. ამის გამო, მას ყოველთვის ოთხი, თუ ხუთი თვისი სარჩო ძლივს მოსდიოდა და დანაჩენ ღროს-კი თვის ნახერობით მშვიერ ოჯახს, წვითა და დავით, მოჯამავირობაში ნაშოვნე ფულით კვებავდა... სამაგიეროთ, ახლა მის ბედს ძაღლიც არ დაყვდა: რალაც შემთხვევამ მოუ-

მართა ხელი და ათიოდე ქცევა ჩინებული მიწა იშოვა დასამუშავებლათ და მაგრათაც მოკიდა ხელი მუშაობას. ამის გამო, მას ასგვარი იმედები ეღვიძებოდა გულში, რომ ის დიდძალ სიმიდს მოიწვედა, მთელი წლის სარჩოსთვის. საზრუნავი არაფერი ექნებოდა და იმდენსაც გაყიდა, რომ ახალ ტანისამოსს შეუკერავდა ცოლ-შვილს. ეს იმედები ფართოთ აღებიებდა თვალებს ტუტუს და დაუზოგველათ ახარჯებიდა ჯანსა და ღონეს.

„ღარიბს შეილები ბლომით უჩრდებოა“ — რომ იტყვიან, სწორეთ ტუტუსე ამბთარიყო. მას ერთი ქალი და ხუთი ვაჟი მისცემოდა; ვაჟები ჯერ სარჩენი და საპატრონო იყვენ და ქალიშვილი კი, რომელსაც რამდენიმე სახელს ეძახდენ, მარა უფრო ხშირათ — ცირუს, 17 — 18 წლის იქნებოდა... ცირუ მეტათ შეგნიერი და წამოსადევი ქალიშვილი იყო. მისი მალალი და, თითქო საგანგებოთ ჩამოსხმული ტანის მოყვანილობა, მეტათ ლამაზი და სწორი პირისახე, წელამდი წაბლის ფერი თმა, ეუყუნა თვალები ერთბაშათ იპყრობდა მნახველის ყურათლებას. მართალია, ის ღარიბულათ იყო ჩამკულ-დახურული, რის გამო მას ერთგვარი თავმოყვარობა ტანჯავდა კიდევ, მარა მაინც ხომ მის სილამაზეს, მის სიღარიბესთან ერთათ ინატრებდა ბევრი ის ქალიშვილთაგანი, რომელთაც აღარ იციან, რომელი ფარჩა-ამრეშუმეულობით მოირთონ. ისიც კია, რო ცირუ ხშირათ მშვიერიც იყო და უფრო ხშირათ ცალიერი მქადით იკვებებოდა. მარა მაინც ვარდყავილი იშლებოდა მის პირისახეზე.

მართა, — ცირუს დედა, და თვით ცირუც ძალიან კარგათ ხედავდენ და გრძნობდენ, რომათ არა თუ აკლდათ, სრულიადაც არ ქონდათ ის საამაყო და საკომწოო ტანისამოსი, რითაც შეძლებოდათ ტოლამხანაგებში თავის მოწონება, რაც მრავალგვარ გულის თქმას ძრავდა მათ გულში. ისინი, და უფრო-კი მართა, წამ და უწუმ უჩიოდენ თავიანთ ბედობლას, სიღარიბეს და შევიწროებულ ცხოვრებას, რის გამო ბრძოლასა და უკმაყოფილებაში ატარებდენ დღე ღამეს, ისინი შრო-



მისა და გარჯისგან არავითარ ხსნას არ მოელოდნენ და არც არაფერს აკეთებდნენ, გარდა იმისა, რომ ეძლეოდნენ დაუბოლოვებელ ოცნებას, რითაც ილაღავდნენ თავს ყოველ დღე — „დასწყველოს ღმერთმა ი ზოგიერთები, — ხშირათ დაობდა დედა შვილთან, — დეიწყებენ ქადაგებას: — კაცი ღარიბი არ უნდა იყვესო. ადამიანმა, თუ ხელი გამეილო, იმუშავა, იმეცადინა, დრო ტყულა არ დაკარგა, ნაშრომს და ნამუშევარს კარგათ მოუარა, თუ ოჯახში თავიანათ გეისარჯა, ღარიბი არ იქნებაო... სამას სამოც და სამმა მთავარანგელოზმა დალუპოს მაგათი სახსენებელი! გულზე მომივა, ამისანა ლაპარაკს რო გვევიგონებ... იმუშავე, — იმუშავეო! მოდექი და იმუშავე ვირივით: სადილი აკეთე, ვახშაში აკეთე, წიწილები დახარდე, ბოსტანი გააკეთე, ძროხა გეიჩინე, ის ოდესღაც ხბოს შეიგებს — გაზარდე, სამი-ოთხი წლის მერე ის ხარი იქნება — გაყიდე, ეს ქენი, ის ქენი, იხლაფორთე, იდავიდარაბე ათი წლის მერმინდელი საქმიზა!.. ამას ვისი გული მეითმენს? თუ ცეცხლში ჩევიწვი, არ დევიძინე, არ შევისვენე, რაცხა იქნება, ქე იქნება, მარა, თუ თავი არ მეყოლება, რამე რათ მიინდა? კაი ისაა, რომ ოჯახში დოვლათი ტრიანობდეს და საზრუნველი არაფერი იყოს, მარა ეს ღმერთს არ მოუცია ჩემთვის, დაწყველოს ღმერთმა ამისანა ბედი და ამისანა ილბალი“, — ამბობდა და თანდათან მოუთმენლობა უღვივდებოდა მართას. მის თვალში, ოჯახის სიღარიბის მიზეზი სულ მუდამ ტუტუ იყო, რომლისგან თხოულობდა ის ხშირათ ისეთს რამეებსაც კი, რომლის შეძლება ტუტუს არ გააჩნდა. მართალია, სოფლის პირობაზე, ზოგიერთებზე ნაკლები შემოსავალი არც მას ქონდა, რასაც ახერხებდა ტუტუ მხოლოდ მოჯავაგრობით და, რასაც მართა უფრო ტანისამოსზე და პირის გემოზე ხარჯავდა. მარა ეს მას არ უფენიდა, რის გამო მას მუდმივი ბრძოლა ქონდა ქმართან.

რა თქმა უნდა, არც ცირუ იყო კმაყოფილი. ის ძალიან კარგათ გრძნობდა თვის სიღამაზეს და გულს უკლავდა ის გარემოება,

რომ ოჯახის სიღარიბეს მეტის მეტი ხელის შემშლელი მნიშვნელობა ქონდა მისი შეენიერების გამოსაფენათ. ის კარგათ ხელავდა, რომ ასე, თუ ისე შეძლებული მეზობლის ქალიშვილები ძალიან დიდ ყურათლებას აქცევდნენ „მოდანზე“ ჩაცმა-დახურვას და კარგათაც იმოსებოდნენ, რასაც მოკლებული იყო ცირუ და ეს გარემოება არა თუ მას, მართასაც სულსა და გულს უწუხებდა, რადგან ასეთი ჩაცმა-დახურვის ღირსი ვერ ხდებოდა ის, ვინც, სიღამაზის მიხედვით, დედა-შვილის შეხედულობით, მართლაც ღირსი იყო ამისა.

ერთ საღამოს ტუტუ ჩვეულებრივზე უფრო მხიარულათ დაბრუნდა ყანიდან და იმ დღის დაბადებული ოცნებით მოისურვა ცოლ-შვილის გახარება. მან ცოტა მორიდებით დაიწყო ლაპარაკი, თითქმის ყოველთვის მწყურლათ მეტყველ მართასთან, რომელსაც ცირუ გვერდით უჯდა და განაგრძო იმის შესახებ, რომ მას დიდძალი საყახებები ქონდა ადებული და, თუ ღმერთი ხელს მოუმართავდა და სიმიდს ფასი ექნებოდა, ასი მანათისას ჩამორჩებოდა. აქიდან სამ ოთხ თუმანს ცირუს გამოსაწყობათ გადადებდა, მართასაც კაი კაბას უყიდოდა, ბაღნებს დამოსავდა და ოჯახსაც გაახარებდა... ცირუ აღტაცებას მიეცა ამ მოსალოდნელი, საბედისწერო ოცნებით; არც მართა გახარებულა მათე ნაკლებ. მარა ის მაინც, ჩვეულებისამებრ, შეკუნტრუშდა, თავი ამაყათ დაიჭირა და ეს აღტაცებაც დამალა, რომ ქმრისთვის თავი არ მოეწონებია. სამაგიეროთ, ცირუ იმდენათ გაიტაცა ოცნებამ, რომ მთელ იმ ღამეს მის თვალებს რუდიც არ მიკარებია. ის ღრმათ ჩაუფიქრდა თვის გამოწყობის საქმეს და იმდენათ ფრთები შეისხა მის გულში ამ საგანზე აღტყინებულმა ოცნებამ, რომ საკაბე შალეების ფერის არჩევაც დაიწყო, რომელი ფერისა უფრო მოუხდებოდა სახეზე... არ დარჩენია გადაუსინჯავ-გაურჩეველი თითქმის არაფერი, რისიც ყიდვა მას უნდოდა და მივიდა იმ წვრილმანზედაც-კი, რომ ფეხსაცმელს ძალიან მაღალ ქუსლიანს იყიდდა და, ხელოვნური სიმაღლის დასამთავრებლათ, ქუსლზე რეზინასაც ამოაკრავდა...



ამგვარი ოცნებით ის მოიღალა, თვალეზში ქინკარივით დაუწყო რალაქამ სუსხვა და სწორეთ ძილი იყო ამ დროს მისთვის საჭირო. მარა, რამდენათ ის აქრელეზულ-აბეპლილ ჩით-აბრეშუმეულოზამ ვაიტაცა, იმდენათ მის თვალეზს ძილი ეკარგებოდა.. „ოხ, ნეტაი, — თქვა მან ბოლოს, — ისე ბედნიერი ვიქნებოდე, რომ ამ სალდგომოთ მექნებოდეს ეს ტანისამოსი, რავა ჩამოუბრაწავდი თვალეზს ტალაფხანაიკებს, რომლებიც თითქო განგებ მეპრანკებთან: — „ჰი, შენ ლამაზი ხარ, მარა ჩვარებში ხარ გამოხოული და ჩვენი აბრეშუმის იუბკების შრიალი თვალეზს გიყენებს, შესაწყალოვო“. — ოხ-ოხ-ოხ! ნახევარი სიკოცხლე მომაკლო და ამ სალდგომოთ მომცა ის ტანისამოსი, რასაც მამა საგაისოთ მპირდება!.. რაია საგაისოთ? ჯერ სიმიდი დათესილიც არაა, უნდა დათესოს, გათოხნოს, დაამწიფოს, მოტეხოს, შეინახოს, გაახმოს, გაყიდოს და, მერე, მე უნდა გამომაწყოს!.. ეს როდის? იქნება ვერც მივაწიო მანამდი! ვაი, ჩემს თვალეზს! შარშან რეიზა არ მეიწია მამამ სიმიდი, რო წროულს გამოვწყობილიყავი?.. აბრეშუმის იუბკა!.. რა კაია, საყვარელო, აბრეშუმის იუბკა, შიშინ-შინი რო გააქეს!.. წროულს, წროულს! არა, წროულს უნდა გემეფეყო მტრის თვალის დასაყენებლათ!.. მარა სიდან? ვაი, ჩემს თავს! წროულს რო სიმიდი არა აქეს მამას?!. მოიცა, მართლა, მამას კაი ნდობა აქ. ყოლგან ენდობიან; შაფათა გინდა ენდობა, გინდა ჩვენი იაკობა; მარა შაფათა ჯობია — შაფათა, იმან მეიტანა ახლა ახალ მოდის შალეზი, აბრეშუმები, კრუჟევეზი, სარუბაშქევი და, რაც გინდა ყოლიფერი აქ... წორეთ ასე ვიზამ, დედას შოუჩენ, ვიტირებ, თვალეზს გვეისივებ და მიინც და მიინც წროულს ვაყიდიებ, ნისიათ ავალეზიებ და, როცა სიმიდს ვაყიდის, გეიტუმრებს... სულ ერთი არაა? — გიყიდიო და, ბარემ, წროულს მიყიდოს, გაისათ არაფელს ვთხოვ... გარაწყვეტილია, სალდგომოთ უნდა მექნეს ყოლიფერი სიკეთე... შენი ქირიმე — შენი, — მხიარულათ დასაკენა ცირუმ და თითები დაიკოცნა სხარულის გამო. ამგვარ ოცნებაში

გართული ცირუ ძილზე სულ არ ფიქრობდა, რო კიდევ გათენებულიყო. — „რა პატარა დამე ჩამოდის ოხერი!“ თქვა მან, ცოტა წყენით და წამოდგა მოზუზული და თვალეზგაწითლებული. ტუტუს და მართას გაუკვირდათ დილის ძილს ჩვეული ცირუს ადრე აღგომა, რომლის მიზეზს მართა მალე მიმხვდარიყო. მარა მიზეზის ახსნას ტუტუ არ გამოკიდებია, მან საჩქაროთ შეისხა პირზე წყალი, გამოისახა პირჯვარი, ერთიც თუთუნი ააბოლა, გაიღვა თოხი მხარზე და გასწია ყანაში.

ამის შემდეგ, ცოტა ხანს კიდევ იყო ცირუ მოწყენილი და ჩაფიქრებული. თითქო დიდი რამ საზრუნავი ვაჩენიაო. ერთიც გაიარ-გამოიარა ეზოში და, შემდეგ, საყვედურით მიუბრუნდა დედას. ის აყვედრიდა, რომ აღდგომა, აგერ, მოსულიყო და მის გამოწყობაზე არვინ ზრუნავდა... გაავებია ის გეგმაც, თუ როგორ უნდა მომხთარიყო მისი გამოწყობის საქმე და ტირილით თხოვა შვამდგომლობა გავწია მამასთან და დავთანხმებია თვის მოსაზრებაზე. მართა ჩაფიქრდა. მას ცირუსთვის არაფერი შურდა. მარა ამ გრძნობასთან საშვალეზა იყო საჭირო და სწორეთ ეს არ გააჩნდა მას. ისიც მიეცა მოწყენას. მას, ამ წამშიაც მძაფრათ წარმოუდგა ჩვეულბერივი აზრები, რო ღმერთს ის უიღბლოთ ვაჩინა, რომ ის ყოველგვარ სიღარიბეს ითმენდა ბეჩავი ქმრის ხელში და სწყველიდა თვის მშობლებსაც ასეთი უიღბლოთ ვაჩენისთვის... ამ სახით, ის კარგა ხანს იყო მოზუზული და გაბუტული; მისი პირისახე მარტის დღესავით იცვლიდა სანახაობას და, ბოლოს, გადაწყვეტა კიდევც, რო, რაც გინდა მოსვლოდა, მაინც გამოეწყო ცირუ სალდგომოთ. ამ ამბავმა ცირუ ძალიან გაახარა. ის, მით უფრო მიეცა აღტაცებას, რო პირობა მტკიცეთ იყო აღთქმული, რაც მას. უეკველათ, სჯეროდა. საჭირო იყო მხოლოთ ტუტუს მოსვლა, რო საკითხი დაბოლავებით გადაწყვეტილიყო, რის გამო, დედა და შეილი მოუთმენლათ მოვლოდენ საღამოს, როცა ტუტუ უნდა მოსულიყო.

მართა მეტათ მხიარულათ დაუხვდა ყა-



ნიდან დაბრუნებულ-დაღალულ ტუტუს, ის ღიმილით შეხვდა ჭიშკართან, მიეხურტრუცა და ისეთი სიტყვები დაუხურდავა, რო ტუტუ ერთბაშათ მოიხიბლა ამ არაჩვეულებრივი შეხვედრით. ის ყოველთვის წყრომა-უსიამოვნებას ითმენდა ცოლისგან, რომელიც დღეში რამდენჯერმე დააყვედრებდა იმასაც, რომ ქმარი ვერ იყო ცოლის საკადრისი, რომ მართა უკეთეს კაცს შეშვენოდა ცოლათ. ტუტუ არ იყო ღირსი ცოლის პატივისცემისა, მორიდებისა და ერთგულობისაც-კი, რის გამო, ალაღმართალი ტუტუ, რომელსაც არ უყვარდა ჭინკელი და ერთხელაც არ შებრძოლებია ცოლს ასეთ შემთხვევაში, ყოველთვის დამარცხებული გამოდიოდა ამ ზნეობრივი ბრძოლიდან და ეს მუდმივი გამარჯვება ათამამებდა ცოლს ქმრის უფლებები შეეხოჯა და თავისუფლათ ეპარაჰა ქმრის კისერზე, რაც, არა თუ მეზობლების თვალში, თვით ცოლის წინაშე უკარგავდა მამაკაც ფასსა და ღირებულობას... ეს საღამო კი არაჩვეულებრივი იყო ტუტუსთვის. ის სასიამოვნო ღიმილი, ის სანეტარო ალერსი, გრძობის გამოხატველი თვლები, ნამდვილი ამხანაგური ნიშნების მაჩვენებელი თანაგრძობა ერთობ სიზმარივით მოეჩვენა მას. ის სიამოვნებით დანებდა ცოლს, რომელმაც დაბანა გამტვირინებული ფეხები, რაც მათს ცოლ-ქმრობაში პირველი შემთხვევა იყო, დააბანა ხელ-პირი, გამოაფხიზლა და მოუსვა ჩინებულ ვახშამს... ქალი ერთობ გრძობით აღვსილიყო და თითოული მისი სიტყვა უკვდავების წყაროთ ეპკურებოდა, ცოლის ამ გვარ ქცევით, განცვიფრებულ ტუტუს გულს. იმ წამში მას ცოლი ისე მოეწონა, რომ ერთი სიტყვა-და იყო საჭირო, რომ ქმარს დაუზარებლათ მიერთმია ცოლისთვის მთელი თვისი სიცოცხლე, მარა დიდხანს არ დაცლია ტუტუს ამ ნეტარებაში შესვენება. როცა ცოლი საკმაოთ დარწმუნდა, რომ ქმარი მოიხიბლა, მოაჯადოვა, თანდათან შეაპარა ლაპარაკი იმაზე, რისთვისაც მან ეს უებარი ხერხი იხმარა.

— იცი რა გითხრა?... გრძობით დაიწყო მართამ.

— რას იტყვი, გენაცვალე?— გრძობითვე კითხა ტუტუმ.

— ჩვენი ცირუ ძაან მოწყენილათაა და ბევრიც იტირა დღეს.

— რეიზა, თუ გიყვარდე; ავით ხო არაა?

— არა, ავით არაა, მარა ძაან გულდაწყვეტილია.

— რა მიზეზია, ვერ გეიგე? რამ შიწუნხა?

— რა და— აგერ ხელში შეგაბერდითო, ჩითის კაბის მეტი ჯერ არაფერი ჩამიცვამსო და იმიზა ტკივა გული.

— ჰმ, ეს სიღარიბემ იცის წყეულმა, თვარა შვილი ვის არ უყვარს? მეც სულ იმას ვფიქრობ, რომ კარგათ გამოგაწყო, კარგათ ჩავაცვა, დავახურო და სხვაზე ნაკლებ გამოწყობილი არ მყავდეს. მარა ჯერ ასეა, და ღმერთმა, თუ რამე მაღირსა, პირველათ იმას გამოგაწყობ— მორიდებით თქვა ტუტუმ, მარა ისე მტკიცეთ კი, რომ უტყუარი გრძობაც თან გაატანა.

— ფიქრით, ბარემ, მეც ვფიქრობ, მარა რა გამოდის აქიდან? კი ისაა, რომ ხელში გქონდეს რამე, თვარა ცარიელი ფიქრი ვის, რათ უნდა?

— კი ბატონო, ისიც კაია; კვილი ფიქრი ყოველთვის მარგებელია... ყოველთვის არ ვიქნებით ღარიბი; ერთ დღეს ჩვენც მოგვცემს ღმერთი ჩვენს წილს, ღვილოცა მისი სმართალი.

— აჰა! მოგცემს და არც არაფელი!.. კი ხანია გევიძახით:— მოგვცემს, მოგვცემსო, — მარა ჯერ არაფელი მოუცია!, დღეს კი არა, ხვალ წვევიმატებთო, გაისათო, გარდამეისათო, მარა ჩვენ წამატებას არაფელი ეშველა, რაცხა საკირეში ჩაუწყველივართ\*) ვინცხა ურჯულოს. საქმელი ჩვენ არ გვაქ და სასმელი, ტანა და ფეხი, მამული და ქონება, ბაღნები ტიტველი დაგვიდის და არც ჩვენ ვართ გახარებულათ, ერთი ქალიშვილი გვყავს და ისიც ვერ გამოგვიწყვია, აწი რავალი ქა-

\*) საკირეში ჩაწყველა, დაბიო ხალხს დიდ წყველათ მიახნია სამეგრელოში. ავტ.



ლიშვილი, მერე? გამლელი იმას კითხულობს და გამომლელი:—„ბედნიერია ამათი მშობლებიო“,—უნობენ და ჩვენ სულაც არ ვფიქრობთ იმაზე, რო რამე ჩავაცვათ და ხალხში გოჸურიოთ... აგერ, აღდგომა მოსულთა, ვისაც ღმერთი მხიარულათ გოჸუთენებს და გულდაწყვეტილი ბოგში შინ გოჸის; ორი ხუთ-შაურიანი ზითის კაბა, თუ მოუძებნეთ მიწურულში, ის ეყოფა, გვეონთა, და იმას კი არ ვამბობთ, რო ძღაბი\*) გასათხოვარია აწი და სხვა ნაირათ უნდა ყურის გდება.

— კი მარა, რაც არ არის—არ არის და უნდა მეეთმინოთ, მარა,—გულდაწყვეტილათ უთხრა ტუტუმ.

— რომ არ არის, უნდა ვიზონოთ; შენ რო არ გქონდეს, ძღაბი რა შვაზია? რაც მეითმინა, ისიც ეყოფა და ახლა ყოველთვინ ხო არ დეიჯერებს? ის კი არა და მისმა ტირილმა სული და გული შემეწუხა დღეს... ამისგან ხელავს, იმისგან ხელავს და ისიც რო შეითხოვდა, არ გვეონა?—ოდნავ საგრძნობელი წყენით შეწყვიტა სიტყვა მართამ.

ტუტუმ ჩაფიქრდა. წამს უკან ნაგრძნობი სიამოვნება გაუქარწყლდა და ხელ-ახლა წარმოუდგა თვისი მუღმივი თანამგზავრი კირ-ვარამი... ის კარგათ მიხვდა, თუ რისთვის აუყვანია მეშვიდე ცამდი მის მეუღლეს, საიდანაც კისრას ტეხით მოდიოდა თავქვე საბრალო აღამიანი. მიხვდა კი, ყველაფერს კარგათ მიხვდა, მარა, რა მერე?—აქ სხვა ლაპარაკი არ შეიძლებოდა: ან უნდა მოეტანა, რასაც თხოულობდენ, ქონდა, თუ არა საშვალება, ან დამნაშავეის კისერი უნდა წაეშვირა წინ, რო მაზე შემხტარიყო გაუკითხავი დედაკაცი და ბარბაროსულათ გაეთელა ის. მან დიდხანს ვერ გაბედა სიტყვის თქმა; ის უაზროთ ფიქრობდა: „აღდგომა!.. აღდგომა—აღდგომა!.. ნეტაო, სულ არ იყოს ეს აღდგომა!.. რეიზა მოდის? ვანა იმიზა, რო მე გამასწოროს დედამაწასთან?.. საბრალო, ჩემო თავო! მთელი დღე სისხლის ოფლი უნდა ვღვარო, რო ლუკმა

ამოვთხარო ი ჩასაქცევ დედამიწიდან, შინ ვბრუნდები და გული უნდა წოუშვირო ამ გველის წიწილა ქალს საწიწნათ და საკორტნათ! შინ ჯოჯოხეთი, გარეო ჯოჯოხეთი! ოხ, ოხ, ჩემო თავო!..“ ამ ფიქრებით მას სიტყვა პირში შეუჩერდა, მარა განაგრძო ცოლმა:

— რა ჩვენზე მდიდრებია, თუ იცი, სისონიკა, ბახვია, კოსტაია; რომ იმათი გოგუები თავადის ქალებივით გამოწიკპულეები დეიარებიან? რა გინდა იმათ არ ქონდეს? შალის კაბა ერთი, მეორე; იუკა აბრეშუმის ფართო კურჩევით გაწყობილი; მაღალ ქუსლიანი პოდსაპოჩქი, ი ქუსლები ჩავარდნილი რო აქ; რუბაშქები რავალი გინდა, შლაპა და კიდევ, რა გინდა?! მოგვედი—მოგვედი, გავთავდი ქალი, კვირეს რომ იოსიკას გოგო ვნახე სატირალში. გამოჸიშულიყო, ბატონო ვაქრის შვილინით; ქალი მაინც იყოს! ჯოჯო, გომბიო, რალაც საძაგელი და ხმალივით გადვიდა მხარზე მარუაა, თუ რაცხა რო არი; გაშლიდა, ბატონო, გეიქნედა იქითაქეთ სახეზე, პირს გეიგრილებდა, დაკეცდა ისევ, გოუშობდა ხელს და მისით ჩამოეკოწილებოდა ვგერდზე ის მარუა.

— მერე რა კაია ეს, მართა?—ძლიეს გაბედა ტუტუმ.—ოსიკას ძღაბი რალა მაინც და მაინც სატირალში დეიწვა სიცხით, როცა ხეთისრისხვა სიტყვ დღეს შვიდი-რვა კაცის სადილ ვახშამს აკეთებს ყოველ დღე და არ დამწვარა? აბრეშუმის იუპკები ახლა ვიცხა-ჭვაცხებს რომ აცვია, ღმერთი რავა არ უნდა გაწყრეს ქვეყანაზე?.. ჰაი,—ჰაი, „ჰაი დრო მოვაო“, უნობდენ და კაი კი არა, მგონი, სუთლათ გადიროს ქვეყანა!..

— ჰო, რეიზა არ ჩეიცვამს, თუ იცი, იოსიკას შვილი როა, იმიზა თუ?! მაღლობა ღმერთს, ახლა ქვეყანა გაწორებულთა: გლეხი და თავადი სულ ერთთა!

— იმას არ გეუბნები, ჩემო მართა, რო ქვეყანა გოუწორებელი იყოს მეთქი, იმას უნობ, რომ აქ, თუ არა, ერთიმეორის წახედულობით წყდებიან; გვიარს ერთი ვიცხა ქალაქში, შეხედავს რაცხა ჯანაბის მოდაა,

\*) გოგო, ქალიშვილი.



ეიტებს მერე ერთი ვაი-უბედურობას და ერთი კაბიზა ყოლიფერი რო დაავირაოს მაინც არ ეშურება. — „იოსიკას თეკლეს მარუა კილიაო“; — რაი, მერე? — იოსიკას თეკლე ხვანტქრის ტანსაცმელშიაო იოსიკას თეკლეა და თეკლე!.. დალოცვილო, შეიკერე უბრალო კაბა, ჩეიცი სუფთათ და, თუ ვარგხარ, იმაშიაო გამოჩნდები, თუ არა და კაბა კი არ გააკეთებს!..

— ამას იმიზა უნობ შენ, რო ყიღვა არ შეგიძლია და საჭიროა თუა, არ გგონია, — წყენით გააწყვეტია სიტყვა მართამ.

— შე დალოცვილო, საჭიროა სხვაც ბევრია, მარა იმიზა კი არ იღებენ ვალს!.. მიწის ბაჟისთვის ლები და საბანი გოუყიდეს გუშინწინ თედორიკას და იმის ძღაბს რო შეხედლო, აბრეშუმის იუბკით დაშრილობს!.. პაპიროზის ქაღალდით თხელი ჩითი უყიდა რუბაშქათ, მიყოლია დანაუწუნ-ნაკუწათ უქკევი, მერე მისულა და, კურთხევა შენს სახელს, უფალო, რას არ შეიგონებენ ე ჯიბის მტრები, კურყევა, თუ რაცხა ჯანაბა, რო არი, იმით გადუკერებია ერთი-მეორეზე. ვითამ რაო და ხორცის კანი უნდა გამოიჩინოს! კაი მიეცა იმას, კაი იმას უქნია!.. გამოწყობილიყო, ბატონო, პარასკევ საღამოს, გული გამეებზიკინებია, თავი მაღლა ეელო და ისე დაბძანდებოდა, რო გულზე შემოყრიდა კაცს... ვის გააკვირებს ამისანა ჩაცმით გლახა თედორიკას შვილი?.. რაცხას იყო მოაყოლა, გუშინწინ, ჩვენმა ნესტორამ და მითხრა, რო ვიღაცა უცხო კაცს უთქვამს: „საკვირელი ხალხი ყოფილა აქანეო, სახში რო შეიხედო, სულ ხუთი მანათის არაფელი მეექვსათ, იმათ სადგომში კაი მეოჯახე ქათამსაც არ დაამწყდოვსოდა, როცა გარეთ გამოდიან, ბურჯუაძეები გეგონებათო...“ ოჯახი დაახსო და კაბა იყიდაო, ამაზე უბედურობა რაღა იქნება?..

— შენ მარტვა გინდა ამისანა კალონი გამოამცხადო? მოკლეთ კითხა განაწყენებულმა მართამ, რომელიც მეტათ გაეჯავრებია ტუტუს სიტყვებს და, ის იყო, ლამობდა იერიში მიეტანა ზრჩი ქმარზე, რასაც ვერ მიმხვდარიყო ტუტუ.

— დაწყევლოს ღმერთმა იმათი კალონი? რა უნდა ღმერთს, რო მარტვა სააღდგომით ვიყვე მაგათი უფროსი! რამდენი უსახურ კაბებს და კალათივით ქუდებს ჩავწვავდი ცეხში!.. რაღა გადაბრუნდა, შენი ქირიმე, ქვეყანა! რაღა გადიროა, ერო არაფლათ ვარგა, იმისანა ხალხი!.. იმიზა კიღემაო ჩვენ მამასახლისს მოუხსენებია თავრობისთვის: — „სოფელი მდიდარია, რასაც იხთის, ორი იმდონის გადახთა შეუძლიაო“. — იმდონი შეველა მის ოჯახს! ოუწყევიათ ახლა და მართლა ორი იმდონი შეუწერიათ. მიდი და უფე ახლა პასუხი! ან რეიზა შეგვიბრალევენ, თუ იცი? ჩვენი თავი ჩვენ თითონ არ გვებრალევა, რამდონიც ვართ, ათი იმდონობას ვჩემულობთ და ვიცხა კაცს სულა რას ებრალევი? „განათლებლაო“! — ღმერთი იმდონს განათლებს იმათ ოჯახს! განათლება კი არა, თლათ დაფსება ახლა მევიდა!

— ჰე, ახლა ამან მოუხსნა, ძველებურათ თავი გუდას, — წყენით და თავდავიწყებით გააწყვეტია ქმარს სიტყვა ცოლმა, — აწი ამის ქადაგებას საშველი არ დაადგება! ამას ნაჩაღნიკობა რო მიცა, სუყველას კაბას აგი დაწვავს; ამას სუდიობა რო მიცა, სუყველას ციმბირში გაგზავნის, ვინც ქუდს დეიხურავს და, რა გინდა, ამან არ ქნას?! საოცარია, რო ყოველი გლახაკი ენითაა გამოტენილი!.. შე გულმტრის შვილო, ამისანა ჭკუის კოლოფი, თუ ხარ, რეიზა შენს თავს არ აჩნია შენი ჭკუა? თვალევი რო დაგიმსო შენმა გამჩენმა, რეიზა არ ხედავ, რო შენისანა გლახები ჭკუას ვერ დეიჩემებს! დარიბი რო ხარ, შე ნეხვო, ეს ისაა, რომ უქკუო ხარ და შენი ქადაგებაც არ ღირს ყურგახვრეტელ კაბიკათ. რაღა ენათ გადიქცა შენი ქირიმე, ეს ამაღამ!.. მე რას ვეუბნები და იგი რას მიქადაგებს აქანე!.. შავათ გაგითენებ, შე უბედურო, აღდგომას, თუ ერთი ვარი გავიბედნია და ძღაბი არ გამოგიწყვიო! — მრისხანეთ დაუმატა მან, საჩხუბრათ გამოსაწყვევი კილოთი.

ტუტუმ თავი ჩაკიდა. ის კარგს არას მოელოდა, იცოდა, რო მისი მეუღლე არ შე



არჩენდა ასეთ გულახდილ მსჯელობას და ნა-  
ნობდა კიდევ, რომ დაავიწყდა, თუ როგორ  
აჯილდოვებდა მას ცოლი ასეთი თავგასულო-  
ბისთვის! ის თავის თავს ემდებოდა, რომ ვერ  
მიხვდა ქალის ოინებს, რომელმაც გამოიტყუა  
სალაპარაკით. მას გული უწუხებდა იმ მოლოდინით,  
რომ ცოლი უზომოდ გათითხნიდა და მანამ არ  
მიატოვებდა ლანძღვა-გინებას, სანამ ძალა და  
მასალები არ შემოეღებოდა ამისთვის... მარა  
ჩაჩუმდა ქალი. მას რაღაცეები წარმოუდგა და  
ენა მოეკაკვა, ტუტუსაც ეს უნდოდა. იმას  
იმდენათ ქონდა თავი მობეზრებული ცოლის  
საქციელთ, რომ თანახმა გახებოდა თავის თავ-  
შესაფარი ქობიც კი გაეყიდა ცოლის ბძანე-  
ბით, ოღონდ არ დატრიალებულიყო მათ შო-  
რის ის უსიამოვნება, რომელსაც იმდენათ  
ერიდებოდა ქმარი, რამდენათაც ის საუკეთესო  
საშვალეობათ მიიჩნდა ცოლს.

— კაი, ბატონო, მამატიე, — კარგა ხნის  
სიჩუმის შემდეგ, ძლივს წარმოთქვა დაფთხალ-  
მა ტუტუმ, რა გაქვს ჩემი საკითხი?... ოღონდ  
გლახათ არ წვეიდეს საქმე და როგორც გინ-  
და, ისე ქენი.

— ჰო და ასე თქვი; გასათხოვარი ქა-  
ლიშვილი ტიტველი მიჯის სახლში და აქ რა  
დროს ქადაგებაა! წროულს მაინც რა პირით  
უნობ ვარს, რომ მოყვები და ქვეყნის ამბავი  
მოაყოფიერ ერთი ძღაბის კაბას! ვერ გევიგე, რომ  
ძველი დრო არაა, წვეიდა ის, აწი არ მო-  
ბრუნდება? ახლა სხვა ჩაცმვა საჭირო, სხვა  
გავლა და სხვა გამოვლა... აღდგომა აღდგო-  
მა და წროულს მაინც არ წვეიყვანო  
ცირუ „პეტრობაზე“, ის ღმერთმა ნუ ქნას.  
ყოველთვის კი არაა ახალგაზღობა! გეივლის,  
გამეივლის, თვალი გოუტყდება; მე მკითხე  
შენ და გამოსაჩენი არაა! ვიცხას იქნება მე-  
წრონება ერთ კაი ბიჭს, შეირთავს და იქნება  
ის წერია ჩვენს ბედზე, რომ სიძემ გამოგვიყუა-  
ნოს სიღარიბიდან... ვინ მიხედავს შენ გაბუ-  
ტულ გოგოს ახლანდელს დროში? მე მკითხე  
შენ და გვარი, მამიშვილობა არ გამოადგვს  
რამეში!

— კაი, მარა ამდონი ლაპარაკი რათ უნდა

ამას? ფული რომ არა გვაქ ახლა, ამას შენც  
კი ხედავ. რამენაირათ გამოაწყვე საქმე და მე  
თანახმა გავიხდები. უთხრა ცოლს გულჩათუთ-  
ქულმა ტუტუმ.

— აწი მე მეუბნები კი არა, შენ უნდა  
ქნა—კაცმა, თვარა მე რა შემძლია—ქალს.

— მე ვიხამ ჰო—მე, მარა შენ წინდა-  
წინ მეელაპარაკე ვაქარს... თამასუქს მიცემ,  
რავდენსაც მეტყვის და, რავაცხა ღმერთი რა-  
მე საშველს მომცემს, გვეისტუმრებ და ის  
იქნება.

ამით დაკმაყოფილდა მართა. უფრო კი  
ცირუ მიეცა აღტაცებას იმ წარმოდგენით,  
რომ ის გამოეწყობოდა, არც ერთ დღეობას  
არ დააკლდებოდა. და განსაკუთრებით—კი წა-  
ვიდოდა დ. ს.—ში—ღღეობაზე, რომლის შე-  
სახებ ბევრი რამეები ესმოდა და ეს გარემოე-  
ბა ასნაირ სიამოვნებას აღვიძებდა მის გულში...  
ერთათ ერთ ტუტუს გულში ტრიალებდა ჯო-  
ჯოხეთი. მას წარმოდგენილი ქონდა, რომ სა-  
მი ოთხი თუმანი, რაც სწორეთ სჭიროდა ცი-  
რუს გამოწყობას, ისეთი ვალი იყო მისთვის,  
რომ არც კი იცოდა, რა საშვალეობით ვადაე-  
ხადა ეს. გასაყიდი არ გაჩნდა რამ და დასა-  
გირავებელი, რომ ბოლო მოეღო უსაშველო  
შოთხოვნისთვის. ერთათ ერთი მისი ქო-  
ნება და იმედი არსებობისა იყო ის შვილივით  
ნახარდი ხარები, რომლებსაც მს წამ და  
უწუმ თავს ევლებოდა და მათი ერთი შეხედ-  
ვა მის დაკოდლ-ღაბეჩაგებულ გულს ამთე-  
ლებდა... ეს ხომ ხელშეუხებლათ მიიჩნდა და  
სხვა წყარო შემოსავლისა არავითარი არ ქონ-  
და... მარა ერთი რაღაც იმედის პატარა ნა-  
პერწკალი მირჩენილიყო ტუტუს დაოსებულ  
გულის სადღაც კუნჭულში და ეს იყო ის,  
რომ ამ შესანიშნავ ვალს, სოფლის გაჭირვე-  
ბული ვაჭარი, ტუტუს დაცემულ ოჯახს არ  
ენდობოდა და სწორეთ ამაზე დამყარებული  
იყო მისი იმედები... ტუტუ აგრეთვე გრძობ-  
და თვის დიდ შეცთომასაც, სახელდობრ იმას,  
რომ ის, როგორც გულღია ადამიანი, აჩქარ-  
და და უდროთ გამოუცხადა ცოლ-შვილს,  
რომ მომავალი ნამუშევრიდან ას მანათს ჩა-  
მორჩებოდა, რაც მან ოჯახის კეთილდღეობას



აღუთქვა და ეს გულკეთილობა ოჯახის მოყვარული ადამიანისა ცოლ-შვილმა სულ სხვანაირათ მოიხმარა. არა ეს უდროოთ გადამცთარი სიტყვა, არა ეს, მთელი ოჯახის შეხედულობით, მომავალი, ვითომც უტყუარი იმედი, — შესაძლებელი იყო ტუტუს ცოლ-შვილს არ მოეთხოვა ის, რაც ტუტუს ძმამეტირთათ დააწვა კისერზე, მარა ამ შეცდომის გასწორება ახლა ნაგვიანვე იყო.

კირილე წეთისოფელელი.

(შემდეგ აქნება).



## დაღუპული ოჯახი.

ზამთარია. ქარი შხუის. სოფლათ, ვისაც ბუნრიანი სახლი არა აქვს და შიგ ცეცხლი არ ღულუნებს, ყველა სიცივისგან ცახცახებს. თუმცა თოვლი არ არის, მარა ზამთარი მაინც თვის სიმკაცრეს არ იშლის. გურიის ერთ სოფლის განაკიდეს, რომელიც რკინის გზიდან სამი, თუ ოთხი ვერსით იქნება დაშორებული, ერთი ქოხი დგას, სოფლურათ რო ვთქვათ, პატარა ბოყვიანი სახლი. სახლის ირგვლივ სიმიდის ჩალის გადანაქვრ ნალერალებს, ისე აბზუილებს ქარი, რო გულის შემზარავ ხმათ ეჭდევა კაცს გულში. სახლის შუა ადგილს პატარა ცეცხლის სინათლე ბეუტავს. ერთი შუახნის დედაკაცი, რომელსაც ღუბჭირი ცხოვრებით ილაჯი მიღვევა, ძლივს მოკიაფე ნაკვერცხლებს ჩაჩერებია, მეტი ფიქრისგან ძილი გატეხია და ათას ნაირი ფიქრები დაფუსფუსებს მის მოსაზრებაში. აგერ, შუადამეა და მის თვალს ძილი არ მიკარებია. უეცრათ ქარმა დაბერა, ბოკონიდან შამოიქრა და ცეცხლის ნალვერდალი გაფანტა. ქალი გამოერკვა და თითქოს გულმოსულათ წამოიძახა: დალოცვილო ღმერთო! აი ქარი რალა რისხვათ მოგვივლინე კიდევ! თითქოს

აგი გვაკდა... მთელი ქვეყანა თოფის ფუტშია გახვეული და ტყვია ისე ცვივა, თითქოს სიმიდის კაკალს თესავს ყანაში მუშაო. ჩემი ქმარი, საწყალობელი საყვალაი ბედნიერი ყოფილა, რო მალე უშველა თავს და გუუდგა გზას. ჩემი დღეი უბედური! სიკტილის დროს მითხრა: ჩემო სალომა, ნუ გეშინია, ორ ბიქს გიტეფე და შენი დარჩენა იგინს არ გუუჭირდებოა! სადაა, მერე? უფროსი შვილი ოსიყმაი, რო სალდათ წეიყვანეს, აგერ, ნა ხევარი წელიწადია და ერთი წიგნის მეტი არ შუუწერია. მას შამიველო დედა: ხუთჯერ „ატაკაზე“ ვიყავიო და ქიგადამარჩინა ღმერთმა და ხვალ კიდავ მივედიართო. ნეტაი, ვიკოდე რაცხა ეშმაკია იგი „ატაკაი“? უთუოთ კაცის მქამელია რაცხა! მიკვირს! აქანაი სკენჩას არ აცილებდა მაქახალას და იგი რაცხა „ატაკაი“ ვერ ღუუშინეს ყველაყამ და ჩაკლეს?! იქნება სული აღარ უდგია უბედურ დედა მისს ახლა... ამბობენ: ქარხალივით ყრია კაცებო. უბედურ ოსიყმის დედას ქე უდგია სული და იქნება იმას ყვაი და ყორანი კორკნის... ვაი, შვილო, თუ მიწაში ჩადებაც აღარ გელირს! გუშინ ბზეხათუნაი გელაპარაკებოდა: ვოჯო, ზირტყუი შენ რა გატირებსო, მთელ საქართველოში მოსახლე არაა ისე, რომ: ან შვილი, ან მამა, ან ძმია, ან ძმისული არ ყავდეს ომში წასულიო და შენ მარტუაი ხომ არ ხარ მასეო. აგი მართალია, მარა ჩემი შვილის მაგიერობას სხვაი ვინ მიქს! ამბობენ: აგი ომი რო გათავდება, ქვეყანას შვიდობა მოეფინებოა, ყველაყამ ბედნიერთათ იცხოვრებსო და, არ ვიცი, რომელ ბედნიერებაზე ამბობენ. ვაი, შვილო ოსიყმაე! შენ თუ ვერაფელს მოესწრობი, სამიწე დედა შენს, რათ უნდა რამე?

ქარი კვლავ ზუზუნს განაგძობდა. ხან და ხან ცეცხლიდან ამოკიაფებული სინათლე სახლის კედელს მოანათებდა. კედელზე თარო მოჩანდა, რომელზედაც ჩამომწკრივებული იყო ჯამ-ჭურჭელი და სადილ-ვახშმისთვის საჭირო ავეჯი. მუხურში ორი წყლის კოკა და ორი დოქი იდგა. ერთ კედრით გძელი



ფიცრის ტახტი იყო მიქედლი კედელზე, რომელიც კედლიდან კედლამდე უწევდა სიგძით; ერთ თავში სალომეს ქვეშაგები იყო მიკეცილი. მეორე თავში-კი სალომეს მეორე ვაჟი იწვა, — გოგია. სულ ბოლოში ბაგა იყო გაკეთებული და შიგ ერთი ძროხა და ერთი გასახედნი მოზვერი ება. წინ ბაგის საპირზე ძუძუმწოვარი ხბო იყო მიბმული. ძროხა, ხან ხბოს უაღერსებდა და ხან მწლაქიმწლუქით ყბას ანძრევდა და იმცოხნებოდა. ეს იყო სულ ოჯახის ალიან ჩალიანი. სალომე წამოდგა, ერთი გადახედა გოგიას ლოგინს და იფიქრა: მადლობა ღმერთს, რომ ჩემი გოგია მანც სახლში იმედით მყავსო. გადიწერა პირჯვარი და მიწვა თვის ლოგინზე. ცოტა ფიქრის შემდეგ, კიდევაც მიეძინა.

გათენდა დილა... ქარი უკუმდგარიყო, საამური დღე იყო. ზამთრის პირობაზე თბილოდა. მოწმენდილი ცა, ბრწყინვალე მზე არემარეს შეენოდა. სოფლებს საქონელი გარე გამოერეკა. ძროხა, ხარი და ცხვარი, თუ რამ იყო, ზოგი ზამთრისგან შეწუხებულ ბალახს ლულნიდა და ზოგსაც მზის სითბოსთვის ზურგი მიეშვირა და ითბობდა. სალომე და მისი გოგიაც ამდგარიყო. შუა ცეცხლი გაეჩაღებია, ცეცხლის პირას ცივი მქადები ჩაეფიცებია და გაფიცებულ მქადს, გოგია მადიანათ შეექცეოდა. ამ დროს მეზობლიდან ქალების კივილის ხმა მოისმა. თან ძაღლებმა ყეფა ატეხეს. გოგია მქადი ხელიდან გაავლო, წინ გოგია გაიქცა და უკან სალომე დაედევნა. მეზობლისას გოგია მისაწრო დედამის და თქვენს მტერს, რაც მან იქ გაიგონა! ვილაკას ამბავი მოეტანა: სალომეს შვილი ოსიყმა და მისი მეზობლის ვაჟი, რომელნიც ომში ერთათ იყვნენ წასული, ორივე ავსტრა-უნგრეთის საზღვარზე მოუკლავთო. გაიგონა გოგია ეს, თუ არა ყვირილი მორთო და გარე გამოვა: — და: ვაიმე, ძმაო ოსიყმაო. ამ დროს სალომეც მივიდა და რა მისი შვილის ხმა და თან ოსიყმა სახელი გაიგონა, ერთი ორი შეკივლა და აქვე დაეცა ცოცხალ-მკვდარი. შამოესიენ მეზობლები, ასხეს წყალი და ძლიეს-ძლივობით

შამოაბრუნეს. მეორე დღეს ძლიეს გონზე მოვიდა; კვლავ იწყო ლოყების კაწვრა და თმების წეწვავლევა. მარა ყველაფერს დასასრული აქ და იგიც შეჩერდა.

მოვიდენ მეზობლებიც, იწყეს თათბირი, აუ როგორ იტირონ ჩვეულებრივათ, რადგან აქ მიცვალებული არ ესვენა! მეზობლებმა და გამოცთილმა ნათესავებმა ურჩიეს: ასეთი საქმე სხვებისაც მომხთარაო და ასე ვქნათო: ნიშანი (ტანისამოსი) დავაფინოთ და ვიტროთო. მართლაც, ასე მოიქცენ. ერთი ქცევა მიწა გაყიდა გოგია ექვს თუმნათ. ზოგიც შესაწირის იმედით შეუდგენ ტირილის თავდარიგს. იყიდეს პურები, საქამადი, ღვინო; შეიკერეს შავები. მოიწვიეს მოყვრები, კუთხემეზობლები, ღვდლები და ჩვეულებრივათ შეასრულეს ტირილი და ვაება...

ტირილის დღე ძალიან მწვავე იყო და მსწრეთათვის. დიდი და პატარა, ყველა გულ ამოსკვნით ტიროდა. ისეთი კაცი ძვირათ ერია ტირილის დღეს, რომ ან შვილი, ან ძმა, ან საყვარელი ნათესავი ომში არ ყოლოდეს და ყველა თავთავის მომავალ უბედურებას ტიროდა.

პურღვინო ჩიხატალახათ ქონდა ყველას. ბევრი დათვრა; ზოგი შესანდობელს სვამდა და ზოგიც კირისუფლის სადღეგძლოს. უტოლუმბაშო სმა იყო და ვისაც, როგორ სურდა... შეხარხოშებული ხალხი ძლიეს თავს იკავებდა, რომ მრავალყამიერი არ წამოგვცოთესო. მეორე დღეს ბევრი აქებდა მასპინძლობას და ბევრი აძაგებდა: ღვინომ მაწყინაო. ასეა, თუ ისე, ყველა კმაყოფილი იყვენ, მარა ღვდელი, მოძღვარი-კი ვერ იყო კმაყოფილი. ამბობდა: ამ დალოცვილმა ამდენი ხარჯი გაწია და ღვდელს საწირავი არ უნდოდაო?!

გათავდა ტირილი... გოგია მწეხვეწა მეზობლების ბიჭებს და ტირილზე საჭირო, რაც ქონდა ნათხოვარი: საინები, ქიკები, ღოჭები, სუფრები, ქვაბები და სხ. პატრონებს დაუგზავნა. მინგრეულ-მონგრეულ ოჯახს, ეზო-მიდამოს დაუწყო დალაგება და, როგორც იქნა, ერთ თუთხმეტს ძლიეს რიგში ჩააყენა.

რ. სჯავახიძე.

(დასასრული ინტება)



# ბ ა ბ ო .

(მთასრობა).

(იხ. გაკვეთება „განთიად“ № 6).

## V.

რა რომ ბაბოსთან საქმე სასურველად დაავიკრგვინა, გიგლამ, თითქოს მიძიმე ტვირთისგან გათავისუფლდაო, თავისუფლად ამოიხსუნთქა. ბაბომ გაიზიარა მისი აზრი და შეგნებულად თანაგრძნობა გაუცხადა მას. ამის შემდეგ, სხვა დაბრკოლება, როგორც არის, მაგალითად, ბაბოს მშობლების „გადამწყვეტი სიტყვა“, ჩირათ არ მიაჩნდა მას. აქ საჭირო იყო მხოლოდ შეყვარებულთა ერთსულოვნობა და თანაგრძნობა, რომელიც უკვე არსებობდა მათ შორის.

მშობლებმაც იმდენი გამჭირახობა და შორსმჭვრეტელობა გამოიჩინეს, რომ აღარ ისურვეს თვისი „ვეტოს“ დადება ახალგაზდების გადაწყვეტილებაზე და მშობლური ლოცვა-კურთხევა მიუძღვნეს მათ სიყვარულით აღსავსე გულით.

ამას მოყვა ნიშნობა და მისი აუცილებელი თანამყოლი კამპანია დაუსრულებელი ქეიფით.

ნიშნობის დღიდან სრულმა წელიწადნახევარმა განვლო... გიგლა უფრო მჭიდროდ დაუკავშირდა ქაიხოსროს ოჯახს. იგი საცხოვრებლად მათთან გადასახლდა, ერთი პატარა, ქუჩისკენ მდებარე ოთახი დაიჭირა და თვისი ხაბაკ-ხუბაკი, რომელსაც შეადგენდა: რკინის სკამ-ლოგინი ძვირფასი ქვეშაგებთურთ, ბამბუკის საწიგნე, მოზილილი ყუთი სხვა და სხვა წიგნებით და ნახატებით სავსე დასხვამრავალი წვრილმანები, რომელიც უკოლ-შვილო კაცის ცხოვრებას ახასიათებს საზოგადოთ, იქ გადაზიდა.

ოთახის მოწყობა პელომ იკისრა, რომლისთვის არ დაშურა თვისი ცოდნა და ენერგია, რამაც უნაყოფოთ არ ჩაუარა. ოთახი კოხტა პატარაძლივით შორთო, ასე რომ შიგ შესვლა ერთგვარ სიამოვნებას გვრიდა ადამიანს. მიუხედავად ამისა, გიგლა დასაძინებლად თუ

შევიდოდა შიგ, თვარა დანარჩენ ღროს სულ ახალ მოყვრებთან ერთად ატარებდა. იგი ახლა შინაურ კაცად ითვლებოდა ქაიხოსროს ოჯახში და, წარმოიდგინეთ, უბრალო საკითხიცი არ გადაწყდებოდა ისე, რო გიგლას არ დაკითხებოდნენ, მისი რჩევა-დარიგება არ მოესმინათ. ამას ისიც უნდა დაუმატოთ, რომ ქაიხოსროს ფაქი არ ყავდა და ეს უფრო აღრმავებდა იმაზე შორის კეთილ განწყობილებას და სიყვარულს.

გარეშე ამისა, მათ საერთო ინტერესიც ქონდათ: ბაბო, რომელიც ერთნაირადვე საყვარელი იყო ორთავე მხარისთვის, საბებიო ინსტიტუტში სწავლობდა, რაც დიდ ხარჯს იწვევდა და, თუ არა შეერთებული ძალა, ერთისთვის, ძნელი ასატანი იყო ამოდენი ხარჯი. მართალია, ბაბოს ბებიათ აღზრდა გიგლას სურვილი იყო, რაზედაც ქალის მშობლებიც თანახმა გაუხდა, ხარჯებიც გიგლას ქონდა ნაკისრი, მარა მიუხედავად ამისა, ისინი შედიოდნენ გიგლას მდგომარეობაში და შეძლებისდაგვარად დახმარებას უწყევდნენ მას. ბაბო ახლა გასათავებელ კურსზე არის და დღეს, თუ არა ხვალ საბებიო მეცნიერებით აღჭურვილი ესტუმრება საყვარელ მშობლებს, გიგლას... ისინი მოუთმენლად მოელიან ამ სანეტარო დღეს და არ ზოგვენ არავითარ საშვალებას, ოღონდ კი მათი იმედი, ბაბო, კარგათ იყოს და არაფერი მოაკლდეს ამ შორეულ ქვეყანაში.

გიგლა შეპირებისამებრ ყოველ თვეში ნახულობდა ბაბოს. იგი ისეარ წავიდოდა თფილისს, რომ რაიმე საჩუქარი არ წაეღო მისთვის.

აგერ, შობის დღესასწაულებიც მოახლოვდა და გიგლა განსაკუთრებული „ძღვენით“ უნდა წაეიდეს ბაბოსთან. ამისთვის „წყვეთილი-თონი“ არის საჭირო, რომელიც ამ ბოლო ხანებში ძლიერ გაუძვირდა მას. გიგლას, შედარებით, მცირე ჯამაგირი ვერ ფარავდა ამოდენა გასაფაღს და იგი ხშირად მეფანშეებს მიმართავდა ხოლმე. მეფანშეებიც, რასაკვირველია, სარგებლობდნენ გიგლას გაჭირვებით და უმოწყალო სარგებელს ღებულობდნენ მისგან. სარგებელს ვინდა ჩივოდა, ოღონდაც ფული ეშოვა და მომავალში კი... ყველაფერი მო-



ხერხდება: მაშინ ბაბო ეყოლება მის გვერდში, სათაყვანებელი ბაბო და მასთან ხელი-ხელჩართული ყველაფერს გადალახავს.

გიგლა ჩაფიქრებული იჯდა თვის ოთახში და სხვა და სხვა კომბინაციებს აწყობდა. ხან ნერვებ აშლილივით დადიოდა კუთხიდან კუთხემდე, ხან კი ფანჯარას მიადგებოდა და უღვაშების გრეხით ცის სიერცემში გაიყურებოდა.

— აა!.. ისილორე... მართლა... ისილორე უარს არ მეტყვის. განა მისი მოყვარე არა ვარ! ნათლია, საყვარული შვილის ნათლიაა! არა, არა... უეჭველათ მასესხებს, უეჭველათ. ოხ!.. რა კარგათ მომეგონდა... — გიყვირთ წაიბუტბუტა გიგლა, საჩქაროთ პიდეკი გადაიცვა და ის იყო ოთახიდან უნდა გასულიყო, რო კარები გაიღო და შიგ ქაიხოსრო შამოვიდა.

— მგონი, წასვლას აპირებდი, შვილო?! წყნარათ შეეკითხა იგი გიგლას და აუჩქარებლათ სკამზე ჩამოჯდა.

— არაფერია, მერვე მოვესწრები!... — მიუგო გიგლამ.

— ბაბოს შესახებ მინდოდა მოგლაპარაკებოდი, — დაიწყო ისევ, ცოტა ხნის სიჩუმის შემდეგ, ქაიხოსრომ. ამ კაი დღეებზე ჩამეკვიწანოთ-მეთქი, გაფიქრე.

— ეს კარგი გიფიქრია, მე და ჩემმა ღმერთმა!

სწორეთ რო ძალიანი იქნება, ძალიანი, — აღტაცებით წარმოთქვა გიგლამ, ქუდი, რომელიც ამდენხანს ხელში ეჭირა, ლოგინზე მიაგდო და მოწყვეტით სავარძელში ჩაჯდა.

— აი ფულიც, შვილო! დღესვე გაუგზავნე. წერილიც მიწერე, რომ, უეჭველათ, ჩამევიდეს, — ამ სიტყვებით ქაიხოსრომ ჯიბიდან მოკრული ცხვირსახოცი ამოიღო, ფრთხილათ გახსნა იგი, ორი ხუთ-ხუთ მანათიანი ქალაქის ფული ამოაძრო და გიგლას გადასცა.

გიგლა თუმცა და ერთხანს უარზე იდგა, მარა შემდეგ ფული ჩამოართვა და გულში-კი მადლობა შესწირა ღმერთს, რო გადაარჩინა სასესხებლათ ხეტიალს.

VI.

დღეებმზრის მიწურული იყო. თუმცა შეენიერი ტაროსი იდგა, რაც ასე ახასიათებს თფილისის მიდამოებს, მარა, მიუხედავათ ამისა, ჩრდილოეთის ცივი სიო ფარულათ დაძვრებოდა და ძვალ-რბილში ატანდა ყოველივე სუდგმულს. მუდამ ცხოველი მზე მორცხვათ გადმოყურებდა სამგლოვიაროთ მორთულ დედამიწას და მკრთალი სხელებით ნაზათ ეალერსებოდა მას. ხალხი შეძღობისდაგვარათ თფილტანთსაცმელში გახვეულიყო და მზის ყურეს აწყდებოდა, რო ცოტათი მაინც გამთბარიყო. მთელს ქალაქში საერთო უსიცოცხლობა და ერთფეროვნება გაშეფვებულიყო.

მხოლოთ საბებიო ინსტიტუტში შეამჩნევდით მოწაფეთა არაჩვეულებრივ გამოცოცხლებას. დილის ცხრა საათი იქნებოდა და გაკვეთილი ჯერ კიდევ არ დაწყებულიყო. მთელს სასწავლებელში დადი მოძრაობა და ფაცა-ფუცი სუფევდა. ახალგაზდა ქალიშვილები: ვინ კარიდროში დასეირნობდა, ვინ იქვე ფანჯრებს მიდგომოდა და ვაცხარებით რაღაცაზე ლაპარაკობდა. ეტყობოდა, ახალ სიოს დაებერა იმათ ცხოვრებაში, რაღაც ახალი ამბავი მომხდარიყო, რომ ასე გამოეცოცხლებია მოწაფეთა მთელი პერსონალი. ყველანი დიდ მოუთმენლობას შეეპყრო და დროგამოშვებით ფარულათ, სამასწავლებლო ოთახისკენ გაიყურებოდენ.

მათი ასეთი ფუსფუსის და ცნობის მოყვარეობის აღმძვრელი მიზეზი გახლდათ რუსეთიდან ახლათ ჩამოსული მასწავლებელი, რომელიც დღეიდან უნდა შედგომოდა თვისი მოვალეობის ასრულებას. იგი ადრე დილით მოვიდა სასწავლებელში და სამასწავლებლო ოთახში თვის კოლეგას ესაუბრებოდა.

ახალგაზდა ქალიშვილებმა თუმც კი იცოდენ ახალი მასწავლებლის ჩამოსვლის ამბავი, მარა ჯერ იგი არავის ენახა და ამიტომ მოუთმენლათ მოელოდენ მის ნახვას. იგი სულ სხვა და სხვა სახით ენატებოდა მათ და სხვა და სხვა გარეგნობას ლებულობდა იმათი წარმოდგენით.

— რა გითხრა, იცით? თურმე, ახალ მა-



სწავლებელს პეტროგრადის უნივერსიტეტში გაუთავებია მედიკური ფაკულტეტი, და იცი, რა კარგაა? პირველი ხარისხის დიპლომი მიუღია, თურმე!..

— რა ქვია მას, ნეტავი?..

— სახელი არ ვიცი და გვარათ კი კატელნიკოვი ყოფილა.

ივან პეტროვიჩი, ივან პეტროვიჩი!.. — ჩაერთა მათ საუბარში ფერ ხორცით სიესე — შაგერემაჩი ქეთო, რომელიც მთელს სასწავლებელში ყველაზე უფრო „ეშმაკათ“ იყო ცნობილი.

— ივან პეტროვიჩი! — იფ, იფ!.. რა კარგი სახელია!..

— რის მასწავლებელი იქნება, ნეტავი?!

— რის და „მუხუდოს!..“ — ხახაროვი რო დაითხოვეს, აღარ გახსოვს?!

— ხო, მართლა, ფიზიოლოგიაზე იკითხავს. მადლობა ღმერთს, რო გადავჩრით ხახაროვის ბუტბუტს!.

— თურმე, იმისანა ხმა ქონებია ახალ მასწავლებელს, იმისანა... ჩვენმა შვიცარმა მიიხრი გუშინწინ... რო ვერ გაძღები მისი მზერით!..

— შენ, როგორ გაჩუმებულხარ გამწყრალი ანგელოზივით? — შეეკითხა ამ დროს ქეთო ჩვენს ცნობილ გმირს, ბაბოს, რომელიც ჯგუფზე შორიახლო იდგა და კრინტ დაუძვრელათ ყურს უგდებდა იმათ საუბარს.

— მე... ისე... — წყნარათ მიუგო მან და ჯგუფს გაშორდა.

ბაბოს ასეთმა უყურათლებობამ ახალი მასწავლებლისადმი ძლიერ გააკვირვა ყველანი. მთელს სასწავლებელში „უენათ“ მონათლულ მატრონესაც კი ამოაბა ამ „საყურათლებო“ ახალმა ამბავმა ენა და გასაოცარი იყო, რო მხოლოთ ბაბო, მუდამ ცელქი, მაღალი ტემპერამენტის მქონე ბაბო სდუმდა და არ ამუღანებდა თვის გრძნობებს.

ყოველივე შედეგს თვისი წარმომშობი მიზეზიც აქვს. ბაბოს სიჩუმესაც, რასაკვირველია, თვისი მიზეზი ქონდა, რომელსაც პატივ-

ცემული მკითხველო, შემდეგ თავში მოგახსენებ.

## VII.

სალამოს ჩაის შეექცეოდა ბაბო საერთო სასადილოში დიასახლისთან ერთათ, რომ დერეფანიდან ზარის ხმა მოისმა. მოსამსახურემ უცნობს კარი გაუღო და, ცოტახნის შემდეგ, ოთახში სადარბაზო ბარათი შემოიტანა და დიასახლისი გადასცა.

— ივან პეტროვიჩი კატელნიკოვ. მკურნალი — ხმა მალლა წაიკითხა მან და სიხარულით აღტაცებულმა — შურდულივით დერეფნისკენ გაექანა. „ჩემო ვანო, ჩემო ვანიჩკა“, — მოისმოდა დერეფანიდან დიასახლისის ხმა.

ყველანი აიშალენ სტოლიდან.

ბაბო-კი გაუნძრევლათ იჯდა თვის ადგილზე და მოუთმენლათ მოელოდა უცნობის შემოსვლას.

ცოტა ხანიც და კარები გაიღო. ოთახში შემოვიდა ახოვანი ტანის ყმაწვილი კაცი, რომელსაც ხელში ქუდი ეჭირა და ხუჭუჭა თმაზე ხშირ-ხშირათ ხელს ისობდა. პატარა წაბლის ფერი უღვაშები კოხტათ დაეწყო და ღრმათ გამომეტყველ სიციცხლით სავსე თვალებს ოქროს ბუდეში ჩაჯენილი სათვალეები ოდნავ უფარავდა. იგი ფართე, სასიამოვნო ღიმილით ხან ერთ ბავშს ეალერსებოდა, ხან მეორეს.

— ძლივს, ძლივს ველირსე შენს ნახვას!.. ბუტბუტებდა დიასახლისი, და ახალმოსულს ხელს არ უშვებდა.

— სხვა, მარუსა. როგორ... ახ, უკაცრავეათ, აქ უცხო ადამიანიც ყოფილა, — შესდგა იგი უცებ ბაბოს დანახვაზე. ბაბო კი ამ დროს მაგიდას ყურესთან იყო გაჩერებული და დაწაფებით მიჩერებოდა მას.

— Позвольте познакомиться; Коленьниковъ. —

— ჩემი ძმა არის, ბაბოჩკა! — დაუმატა თვის მხრით დიასახლისმა. — რამდენი ხანია არ მინახავს; თუ ველირსებოდი, არ მეგონა; თითქმის ჩემს კალთაშია გაჭდილი!.. როგორ დავაქაცებულა!.

— დიახ, დიახ, ჩემო ძიძავ, ჩემო ძიძავ!.. ხომ კარგათ? მართლა, მე ხელი შეგიშალე



თქვენ. დაბრძანდით, დაბრძანდით. ბოდინს იხილ, რო შვეგაწუხეთ!

ყველანი დასხდნენ. ივან პეტროვიჩმა პალტო და ქული მოსამსახურეს გადაცა, ფრთხილათ სათვალეები გაისწორა და იქვე დიასახლისის გვერდით დაჯდა. ბაბო თითქმის პირდაპირ უჯდა მას და ფარულათ მისკენ გაიყურებოდა; და, როდესაც მისი თვალეები პირველათ შეხედნენ ივან პეტროვიჩს ეშმაკურათ მოელვარე თვალებს, ბაბოს სხეულში რალაც გრძნეულმა ჟრუანტელმა დაიარა, გულმა არა ჩვეულებრივი დაგა-დუგი დაუწყო და თვალეები უნებლიეთ დაეშვა. იგი მაშინვე წამოდგა, ზდილობიანათ გამოემშვიდობა იქ მყოფთ და ჩქარის ნაბიჯით თვის ოთახში გავიდა.

ერთხანს აღელვებული დადიოდა იგი ოთახში; წიგნის კითხვაც კი ცადა, მარა გონება არ დაემორჩილა და, თუმცაღა ჯერ თერთმეტი საათიც არ შესრულდებოდა, დაწოლა ამჯობინა. მან სწრაფათ გაიხადა ტანზე, ლოგინი გაასწორა და მოწყვეტით შეგორდა შიგ. მარა დრო მიდიოდა; მას თვალზე ლულუც კი არ ეკარებოდა. საღამურის მკრთალი სინათლე ოდნავ ცემდა ვარდევით აკოკრებულ პირისახეზე და ნაზათ გაილურსებოდა. ხელები თავქვემ ჩამოედვა და ბროლივით ნათალი გულ-მკერდი თოვლივით მოკივითობდა ოდნავ განათებულ სივრცეში.

საღამურის სინათლე ხომღს ხედებოდა და თავისებურ ჩრდილს ისროდა ქერზე.

ჩრდილი თანდათან განსაზღვრულ გამოხატულებაში იქმნებოდა. აგერ—მხრებიც დაეტყო... გულ-მკერდი... ტანის მოყვანილობა, თავიც მოება, პაწაწკინტელა უღვაშები... უყურეთ სათვალეებიდან, რა რიგ დაჟინებით მიჩერებია ბაბოს, ღიმილი, ეშმაკური ღიმილი, ხელებიც გაიქნია, ბაბოს ეძახის... „ახ! ივან პეტროვიჩი!“ გიჟივით წამოიძახა ბაბომ და მთელი სხეულით აცახცახებული ლოგინზე წამოჯდა.

მოჩვენება წამსვე გაქრა...

თვალწინ ისევ ცალიერი ოთახი, მოლაპლაპე საღამური და ქერზე ხომლისგან ნასროლი ჩრდილი.

— თფუ, დაწყევლოს ღმერთმა!..— წყნარათ ჩაილაპარაკა ბაბომ, კედლისკენ იბრუნა პირი და საბანში კარგათ გაეხვია, იქნება აღვლილათ ჩაძინებოდა...

გ. ებრაელიძე.

(შემდეგი იქნება).



**რა არის ცოცხალი ორგანიზმი?**

(სამეცნიერო წერილი)

დღეს მეცნიერების მიერ უკვე დამტკიცებულია, რომ მთელი ქვეყნიერება წარმოდგენილია ერთი დასაწყისისგან: სულიერი არსებანი, მცენარენი და ლითონები შესდგებიან იმ ნაწილებისგან, რომლებსაც იღებენ მიწისა, ჰაერისა და წყლისგან. ეს ნაწილებია: მჟავ-ბადი, ნახშირ-ბადი, წყალ-ბადი, აზოტი, გოგირდი, ფოსფორი და სხვა.

მთელ ქვეყნიერებას მეცნიერება ყოფს ორ ნაწილათ: ორგანიულ და არა ორგანიულ სამეფოთ. პირველს ეკუთვნიან სულიერი არსებანი და მცენარენი, ხოლო მეორეს-კი ლითონები, მარილები.

ორგანიული—ცოცხალი არსებანი იბადებიან, იზრდებიან, იკვებებიან, ბერდებიან და კვდებიან.

ჩვენ რომ ავიღოთ და გავშინჯოთ მიკროსკოპის საშვალეებით ცოცხალი არსების სანაშენო კვრები და მცენარის თესლი, დავინახავთ, რომ იგი წარმოადგენს ერთ უჯრედოვან მორგვალო სხეულს, რომელსაც აკრავს გარშემო აბკა, შიგთონილო მარცვლის მსგავსი ნივთიერებაა და ამას-კი შუაში 2 რგვალი პაწაწკინა გული უზის.

აი, ეს ერთ უჯრედოვანი სხეული, მამრობითი სანაშენო უჯრედთან შეერთებით განაყოფიერებული, იქნის ახალ ძალას, იწყებს გავითარებას, ზრდას და თანდათან ერთი უჯრედისგან დაყოფითი გამრავლებით ჩდება მრავალ უჯრედები, რომლებიც ბოლოს ერთათ ყველანი შეადგენენ ერთ მჭიდრო რთულ ორგანიზმს—სხეულს.



როგორც ზემოთაც ვთქვით, თავდაპირველათ უჯრედი მორგვალოა, შემდეგ-კი გამრავლებისთანვე ჩდება უჯრედები სხვა და სხვა მოყვანილობისა. ამასთანვე ამის უჯრედებიც, რომლებიც მოკლებულნი არიან აბკას და არც გული აქვთ შუაში.

ყოველი უჯრედი, — როგორც უპირველესი და უმარტივესი ცოცხალი ელემენტი, იკვებება, იზრდება, მრავლდება, ბერდება და კვდება.

უჯრედები ერთი მეორესგან განსხვავდებიან, როგორც თვისი მოყვანილობით და სიდიდით, ისე განსაკუთრებული თვისი თვისებებითაც. ასე, მაგალითათ, ის უჯრედები, რომლისგან მუსკულებია, მოძრაობის მოკუმშვის და გაშლის თვისება აქვთ, ნერვების უჯრედების თვისებას განსაკუთრებული გრძობიერება შეადგენს, ღვიძლის უჯრედებს ნაღველი გამოაქვს, სანერწყვე ჯირკვლების უჯრედებს-კი ნერწყვი, კუჭისას კუჭის წვენი და სხვა.

ამგვარათ, უჯრედებისგან შეიძლება სხვა და სხვა ქსოვილი, ქსოვილებისგან სხვა და სხვა ორგანოები, ხოლო ყველა ორგანოები-კი ერთათ წამოადგენენ იმას, რასაც ჩვენ სხეულს — ორგანიზმს ვეძახით.

როდესაც მეცნიერებამ შეისწავლა მცენარეთა აგებულება, აღმოჩნდა, რომ დიდი მსგავსება ყოფილა სულიერ არსებათა და მცენარეთა აგებულებათა შორის. როგორც სულიერი არსება, მცენარეც უჯრედებისგან შედგება, მცენარეც, როგორც სულიერი არსება, წარმოდგება მამრობითი და დედრობითი სანაშენო უჯრედთა შეერთებით, თანდათან უჯრედების დაყოფით და გამრავლებით წარმოდგება მცენარის ორგანიზმი. — მცენარის უჯრედები იკვებებიან, იზრდებიან, მრავლდებიან, ბერდებიან და, ბოლოს, კვდებიან. განსხვავება მხოლოდ იმაშია, რომ სულიერი არსების ორგანიზმი უფრო მეტათ გაერთიანებულია.

მეცნიერების აზროვნობა დღეს კიდევ უფრო წინ წავიდა.

დღეს მეცნიერებამ სულიერ არსებათა და მცენარეთა მზგავსი აგებულება ლითონებში და მარილებშიაც ჰოვა. როგორც სულიერი არსების და მცენარის ორგანიზმი შედგება უჯრედებისგან, ისე ლითონებიც კრისტალებისგან შედგება. ამ კრისტალების თვისებას შეადგენს გამრავლება, ზდა, საზღოობა, რეგენერაცია — აღორძინება, იარების გამოთლება და მოძრაობა. თუ ჩვენ უბრალო მომაკვდავნი ამას ვერ ვამჩნევთ და მხოლოდ მეცნიერების ქუპა-გონება ვაქვრეტს, ეს იმიტომ, რომ ლითონებში სიცოცხლის ნიშნები იმდენათ სუსტია, შედარებით; სხვა ორგანიზმებთან, რომ დიდი დაკვირვებაა საჭირო, რომ შეამჩნიოს ეს.

სულიერი არსებანი, მცენარენი და ლითონები ერთა და იგივე ელემენტებისგან შედგებიან, განსხვავება-კი ამ ელემენტების რიცხვშია. მაშინ, როდესაც სულიერი არსების უჯრედები შედგებიან მეტ ნაწილებისგან, რომელიმე ლითონი შესაძლოა შედგებოდეს მხოლოდ ერთ ნაწილისგან.

ამგვარათ, მთელი ქვეყნიერება წარმოდგენს ცოცხალ მატერიას. ორგანიზმებათ უნდა ჩაითვალოს არა მარტო სულიერი არსებანი, არამედ მცენარენი და ლითონებიც-კი. თვით ადამიანი წამოადგენს მხოლოდ მინუშს უმწვერვალეს გაერთიანებამდი მიღწეულ ორგანიზმს მრავალ უთვალავ ორგანიზმთა შორის. ყოველ ცოცხალ ორგანიზმში განუწყვეტელი მუშაობაა. მუშაობას მეცნიერებაში ეძახიან არსების ყოველ გვარ მოქმედებას: მუსკულების, საჭმლის მოსანელებელ ორგანოთა მუშაობას, ყოველი მაჯის ცემა, ყოველი ჰაერის ჩასუნთქვა და ამოსუნთქვა ფილტვებიდან, ხუთ გრძობათა ორგანოების მოქმედება არის შედეგი მუსკულების და ნერვების მუშაობისა. ამგვარ მუშაობას ჩვენ ისე ვართ შეჩვეულნი, რომ მას მუშაობათაც არც კი ვთვლით. ამათკენ წარმოიდგინეთ ისეთი შემთხვევა, როდესაც ადამიანი იძულებულია გაატაროს ერთი თვე ბნელ დაკეტილ ოთახში და, შემდეგ-კი გამოუშვით გარე მზეზე და თქვენ მაშინ მიხვდებით, თუ რა მძიმე მუშაობა ყოფილა მზერა.



ღიან, ცოცხალ სხეულში მუშაობა განუწყვეტელია; მხოლოდ შესწყდება რა უკანასკნელი მაჯის ცემა, წყდება რა არსებაში სიცოცხლე, წყდება მუშაობაც. რაც ზედმეტ მოძრაობაშია სხეულის ნაწილები, იმდენათ სხეულიც ზედმეტ მუშაობას განიცდის.

აი, ამ მუშაობის შედეგია ის განუწყვეტელი დაშლა უჯრედებისა, რომელიც ხდება ყოველ ცოცხალ სხეულში და, რამდენიც მუშაობა უფრო ძლიერია, იმდენათ ძლიერია ეს დაშლაც. სხეულის უჯრედების დაშლა მუშაობის დროს იმაში მდგომარეობს, რომ უჯრედები იწვის და, რამდენათ უფრო ძლიერია ეს დაწვა, იმდენათ უფრო მეტი სითბო ჩდება სხეულში, ხოლო სითბო-კი შექნის იმ ძალას—ენერჯიას, რომელიც გარდიქმნება მუშაობაში.

მეცნიერთა გამოანგარიშებით ადამიანის სხეულში დღე—და ღამის განმავლობაში შესაძლავა შეიქნეს იმდენი სითბო, რომელიც საკმარისია, რა ვათბოს ოცდაათი (30) ბოთლი წყალი 100° C—ამდე.

რას უნდება ამდენი სითბო? ნაწილი ამ სითბოსი უნდება ადამიანის სხეულის მუდმივი სითბოს შესანახათ, რომელიც უდრის 37° C., მეორე ნაწილი სითბოსი გარდიქმნება იმ ძალათ, რომელიც საჭიროა სამუშაოთ, ნაწილიც ხმარდება იმ ჰაერის გასათბობათ, რომელსაც ადამიანი ისუნთქავს; დანარჩენი სითბო, რაც ზედ-მეტს შეადგენს და მოთხოვნილებას აღემატება, სხეულიდან გარეთ გამოდის.

სხეული ზედ მეტი სითბოსგან უსათულოთ უნდა გათავისუფლდეს, თვარა ზიანი მოელოს. ამ შემთხვევაში დიდ საშვალეებს აძლევს კანი, რომელიც ადამიანის სხეულს აკრავს: კანი არის ის რეგულიატორი, რომელიც გარემოების მიხედვით, ხან მეტს სითბოს უშვებს სხეულიდან, ხან ნაკლებს, ხან-კი სულ—არა.

მეორე საშვალეება, რომლის წყალობით სხეულში დაგროვილი ზედ-მეტი სითბოსგან თავისუფლდება სხეული, არის ოფლი.

რამდენათ უფრო მეტი სითბოა მოგროვილი სხეულში, ზედ-მეტი, არა—სასურველი მისთვის, იმდენათ უფრო და უფრო მეტს ოფლს ასხამს ადამიანს, იმდენათ უფრო მეტი სითბო გამოდის გარეთ; ოფლი კანზე ორთქლათ იქცევა და აშრება მას, რის დროსაც კანი გრილდება და სხეულს კიდევ უფრო მეტი სითბო აკლდება.

რაც მეტ მოძრაობაშია და მოძრაობაშია სხეული, იმდენათ უფრო მეტი იწვის უჯრედები, იმდენათ უფრო მეტი სითბო ჩდება სხეულში. დღე უფრო მეტი წვაა უჯრედებისა, ვიდრე ღამე, ძილის დროს, როდესაც მუშაობა სხეულისა უფრო შემცირებულია. მზებზე სინათლეში უფრო ცხოველია ეს დაწვის პროცესი, ვიდრე სიბნელეში. ტან-მთელი, ახალგაზდა ორგანიზმი უფრო მეტს სითბოს აჩენს, ვიდრე მოხუცი, დედა-კაცის ორგანიზმი უფრო სუსტია ამ მხრივ, ვიდრე მამაკაცისა.

ის სითბო, რომელიც მუშაობის ძალათ გარდიქმნება მარტო სხეულის უჯრედების დაწვისგან რო ჩდება ოფლს, მაშინ ყოველი სულიერი არსება, როგორც სანთელი, რამდენიმე დღე დაიწვოდა.

ის ხარჯი უჯრედებისა, რომელსაც სულიერი არსება ყოველ გვარს მუშაობის დროს განიცდის, საბედისწერო იქნებოდა, მხოლოდ რამდენიმე დღე გაუძლებდა, რო სხეულს საშველი არ ქონდეს. ეს საშვალეება არის საზრდო, რომლითაც სულიერი არსება ყოველ დღე იკვებება.

აი, საჭმელი აძლევს იმ მასალას სხეულს, რომლისგან უშთავრესათ ჩდება სხეულში სითბო. ამასთანავე საჭმლის დანიშნულებაც ისაა, რომ იგი აძლევს იმ მასალასაც, რომლითაც ივსება უჯრედების დანაკლისი. აი, ამიტომაც, რომ ადამიანი, როგორც ყოველი სულიერი არსება, ვერ გაძლებს დიდ ხანს უსაზრდოთ, როგორც დაკვირვებამ გვიჩვენა დიდი დიდი, რომ ადამიანმა 20—25 დღე გასძლოს, შემდეგ-კი ადამიანი კვდება, უჯრედებს იმდენი ნაწილე-



ბი აკლდება, რომ არსებობის ძალა სრულე-  
ბით ერთმევა.

აქედან ჩანს, თუ რა დიდი დამოკიდე-  
ბულება ყოფილა ადამიანის სხეულის და სა-  
ქმელის შორის.

ის ჩვეულებრივი საქმელი, რომლითაც  
ყოველი არსება იკვებება, შესდგება იმავე ნა-  
წილებისგან, რა ნაწილებისგან შესდგება  
თვით არსების უჯრედები—სხეული.

სხეული შესდგება ცილის-მაგვარი ნივთი-  
ერებისგან, სახამებელი—შაქრისგან, ქონისგან,  
მარილისგან და წყლისგან, ეს უკანასკნელი  
შეადგენს სხეულის 700/0.

აი, სწორეთ შესაფერი სასარგებლო  
საქმელიც ის არის, რომელიც ამ ნაწილების-  
გან შედგება.

კუჭიდან და ნაწლავებიდან მონელებულ  
საქმლის გამონაწერი ზემოხსენებული ნაწი-  
ლები გადადის სისხლში, სისხლს-კი ეს ნაწი-  
ლები მყავ-ბალთან ერთათ მიაქვს უჯრედებთან  
და იქ ხდება, როგორც დაწვის, ისე უჯრედ-  
ბისვე აღორძინება.

ამ გვართ, თუ რომ ადამიანს სული  
უდგია, თუ რო მას შეუძლია სიცოცხლის  
მუშაობის გაძლოლა, ეს მხოლოთ საქმლის სა-  
შვალდებით, ვინაიდან, როგორც ხედავთ, სა-  
ქმელი იძლევა იმ ელემენტებს, რომლისგა-  
ნაც თვით სხეული შესდგება.

ასე რო, შიმშილი ის გრძნობაა, რომე-  
ლიც ანიშნებს, რა სხეულში მოხდა ისეთი  
ხარჯი, დანაკლისი უჯრედებში, რომლის შეე-  
სება საქმლით აუცილებელია. უსაქმლოთ  
გაძლებს სხეული მხოლოთ ძლიერ მოკლე  
ხანს; მაშინ სხეულში ყოველი მუშაობა მხო-  
ლოთ უჯრედების დაწვა-დაშლაზე დამყარ-  
ბული. რამდენათაც მეტს გასტანს ამ გვარი  
მდგომარეობა სხეულისა, იმდენი უფრო მეტი  
ძალ ღონე ერთმევა და ემატება სისუსტე სხე-  
ულს; ბოლოს-კი, როდესაც სხეულს ნახევარი  
თვისი წონა მოაკლდება, სულიერი არსებაც  
კვდება, უწყლოთ სხეული კიდევ უფრო ნაკ-  
ლებ ხანს გასძლებს. ჯერ ეს ერთი, რო, რო-

გორც ზემოდაც აღვნიშნეთ, 700/0 სხეულისა  
წყალს შეადგენს, მაშასადამე, მოთხოვნილობაც  
წყლისა სხეულში გაცილებით უფრო მეტიცაა;  
მეორეც ისა, რა სხეული დიდ-ძალ წყალს  
კარგავს ყოველ დღე-ღამე, რომლის რაოდე-  
ნობა უდრის 8--10 გირვანქას. ამიტომაცაა,  
რო წყლის-წყურვილი ასეთი მწვავე გრძნობაა,  
რომლის დაუკმაყოფილება ადამიანს საშინელ  
ტანჯვას აყენებს.

ქეიმი ბადრიძე.

(დასსრული იქნება).

# კ რ ი ტ ი კ ა .

აკაკი წერეთელი და ილია ჭავჭავაძე\*). დღესასწა-  
ულებზე 2 მაისს 1889 წელს.

ამ კვირის გმირათ შეიქნა ქართველთა  
მგოსანი აკაკი რ. წერეთელი.

ამ მწერლის სალიტერატურო ღვაწლის  
მადლიერმა დაფასებამ მიხეილის საადგილმამუ-  
ლო ბანკის (ქუთაისშია) საერთო კრების მი-  
ერ ძლიერი და სასიამოვნო ჩაბეჭდილება მო-  
ახდინა ჩვენი საზოგადოების ყოველ წრეზე -  
და არა მარტო ქართველი საზოგადოების. გან-  
საკუთრებით ნიშანდობილივია ის გარემოება,  
რო გაცხარებრილი საერთო ლაპარაკის დროს  
ამ ფაქტის შესახებ სრულიათ არ მოისმის რა-  
იმე უთანხმოების, ან წინააღმდეგობის ხმები.  
ყველა, დიდიდან დაწყებული პატარამდი, კმა-

\*) ქართველი დიდი კრიტიკოს-პუბლიცისტის  
ეს წერილები დღეს პირველათ ჩვენს ჟურნალში ისტამ-  
ბება ქართულათ. სულ წინაპირველათ-კი დაისტამბა  
„Новое Обозрѣніе“-ში ამ სათაურით: დღესასწაუ-  
ლებზე (На праздники). ეს თარგმანი ისტამბება დე-  
დანის თანახმათ, რომელიც დაიბეჭდა 1889 წ. სრუ-  
ლიათ უსვლელათ, ისე, რომ არცერთი ფრაზა, ან  
სიტყვა არს ჩამატებულია ახლათ, არს გამოკლებულია.

რედაქცია.



ყოფილია იმისი, რომ მგოსანს დაუნიშნეს ეს, არსებითად რომ ვთქვათ, მეტისმეტათ მცირე—1500 მანათის პენსია. „ნოვოე ობოზრენიე“-მ აღნიშნა ეს ფაქტი და სრული თანაგრძნობა გამოუცხადა მას. ამიტომ მე მეტათ მიმაჩნია ამავე საგანზე ლაპარაკი. ეს თავისთავათ იგულისხმება. მარა, რადგან ამ სასიამოვნო ფაქტმა გამოიწვია, თუ გააძლიერა ინტერესი მგოსანის მოღვაწეობისადმი იმ მკითხველებშიაქცი, რომელნიც ქართულ ლიტერატურასა და მის მწერლებს გაგონებით თუ იცნობენ, — ამიტომ მე აუცილებელ საქმეთ მიმაჩნია სრულიათ სხვა მხარეს შევეხო: მე მინდა თ. აკაკი წერეთლის სალიტერატურო მოღვაწეობის შესახებ ჩემი თუნდაც ვაკერითი შეხედულობა გამოვთქვა. დავიწყეთ იქიდან, რომ თ. აკაკი წერეთელი ამ სიტყვის სრული მნიშვნელობით ნამდვილი და ქეშმარიტი პოეტია. ეს ცოტაა: ის ერთად ერთი მგოსანია უკანასკნელი საუკუნის ნახევრის ქართველ მოლექსეთა შორის. ამას იმ მნიშვნელობით ვამბობ, რომ მათ შორის მხოლოდ თ. აკაკი წერეთელს აქვს ბუნებიდან მიმადლებული ის სპეციალური ნიჭი, რომელიც პოეტებს ქმნის. იმას გარდა, ეს იშვიათი სიკეთე უკანასკნელ დროის დანარჩენ ქართველ მოლექსეთა შორის (მათი სახელი-კი ლეგონია) მინიჭებული ქონდა, და ისიც ხელმოკერილათ, მხოლოდ გ. მ. ქოჩაქიძეს (ქალადიდელი), რომელმაც სამოცდამეათე წლების მიწურულში ის იყო გამოანათა ქართულ ლიტერატურაში, მარა მალე ჩაქცნა, ვაცილებით ადრე აყვავებამდი. მხოლოდ თ. წერეთელს შეუძლია ამოუდგეს გვერდში მეორმოცე წლების მეორე შესანიშნავს ქართველ პოეტს თავ. ნიკ. ბარათაშვილს, — და ამ ორმა მგოსანმა სახეებით ამოწურა მიმდინარე საუკუნის საქართველოს ნამდვილი პოეზია, მხოლოდ მათ შეიტანეს ამ პოეზიაში სუბუქსა და სადა ფორმასთან ერთათ ცოცხალი, უკვდავი სახეები, და მხოლოდ მათი ქმნილებანი, უკვე ღრმათ ჩაბეჭდილნი ხალხის ხსოვნასა და შეგნებაში, დატოვებენ წაუშლელ კვალს, რომე-

ლიც მარტო ბუნებრივად პოეტური ნიჭით დაჯილდოვებულ პირთა კუთნილებას შეადგენს. თავ. აკაკი წერეთლის სალიტერატურო ნიჭის ძალა პირდაპირ საოცარია. შეიძლება სრულიათ გადაუჭარბებლათ ვთქვათ, რომ ის თვისი ბუნებრივი ნიჭით ყველა კავკასიის თანამედროვე მწერალზე, პოეტსა და პროზაიკოსზე მაღლა დგას, სრულათ გამოუყვებლათ. ყველა ჩვენგანზე ვაცილებით მეტია მასში დაუფასებელი ნიჭი, მწერლის უზენაესი ძალა, ელექტრონის ნაკადის მსგავსათ მკითხველების გულის გამსქვალველი ყოველთვის, რაზედაც არ უნდა დაიწყოს მან ლაპარაკი. ის აფხიზლებს, აღვიძებს, ფეხზე აყენებს დამბლადაცემულებსაც-კი და ტოვებს საუკუნო წაუშლელ კვალს არა მარტო თვისი აზრით, არამედ მისი გამომახატველი ფორმითაც, — და თითქმის ფორმით უფრო, ვიდრე აზრით. ერთი სიტყვით, ყველაფერი ის, რითაც მარტო ქართველურათ გულზე ბუნებას შეეძლო დაეჯილდოვებია მწერალი, უზომოთ და თავდაუქურდლათ მიცა მან თავ. აკაკი წერეთელს და იმგვარ ფარგლებში, რომელზედაც ოცნების უფლება-კი არ აქვს არც ერთს თანამედროვე კავკასიელ მწერალს.

გულზევით დაჯილდოვებული ასეთი იშვიათ ნიჭით, თავ. აკაკი წერეთელი ყრობის წლობიდან გამოვიდა სალიტერატურო ასპარეზზე, 1857 წელს, ჯერ კიდევ გიმნაზიაში ყოფნის დროს. ქართულ ლიტერატურაში შეუძლებელია რასმე შეედაროს ის ჩაბეჭდილება, რომელიც მისმა პირველმავე ლექსმა მოახთინა. მხოლოდ რუსულ ლიტერატურაში შეიძლება შეგვხედეს ამის მსგავსი რამ, სახელობ, პუშკინის ახალგაზდა მუხის პირველი ნაბიჯებით გამოწვეული ჩაბეჭდილება. ყველა ერთობით, ნასწავლებიც და უფიცებიც, მიხედენ, რომ ასო წით მორცხვათ ხელმოწერილ ლექსებში ჟღერს „ლექსის არმონია“, რომლის, ა. ნ. მარკოვის გამოთქმით, ღვთიური საილუმოვების ძებნა ბრძენთა წიგნებში ამაო შრომა იქნებოდა. ამ ლექსების ენა გაირჩეო-



და წმინდა ხალხური კილოს მანამდე გამოუცხადებელი სიშენიერითა და სისუბუქით, იმ კილოსი, რომელიც სრულიათ თავისუფალი იყო მწიგნობრული ხელოვნობისა და განსაზღვრულობისგან. საზოგადოთ, თავ. აკაკი წერეთლის სალიტერატურო მოღვაწეობის პირველი დღიდან უკანასკნელამდე, მან ქართველ სიტყვიერებაში მოიპოვა და სავსებით შეინარჩუნა ისეთივე მნიშვნელობა, როგორც პუშკინს აქვს რუსული ლიტერატურის ისტორიაში, თვისი თხზულებების ენისა და ფორმის მხრით.

მან პირველმა, და მერე ყველაზე უფრო მეტათ თვის თანამოძმეთა შორის, მძლეთ დაუახლოვა ლიტერატურის ენა ხალხურს იმით, რომ მიანიჭა მას საოცარი მოქნილობა და გრაცია, გამომეტყველება და მდიდარი გამოთქმა. და, რადგან ახლა მე ვწერ არა დიფირამბს, არამედ კეთილსინდისიერ შეხედულობას პოეტის მოღვაწეობაზე, ამისთვის, ყოველგვარი გაუგებრობისა და ცალმხრივობის ასაცთენათ, უნდა დავუმატო ჩემს მსჯელობას, რომ ეს მსგავსება თავ. აკაკი წერეთლის როლისა ქართულ ლიტერატურაში და პუშკინის მნიშვნელობისა რუსულში, საუბედუროთ, მხოლოდ ერთითა და ფორმით განისაზღვრება.

ვგადახს, რომ ქართველმა მგოსანმა ვერ შეძლო რუსის მსგავსი გამხდარიყო და ძირიანათ შეეცვალა თვისი სამშობლოს სალიტერატურო ნაწარმოებთა არა მარტო ფორმა, არამედ შინაარსიც. ეს დიადი პატივი—მშობელი ხალხის სალიტერატურო ძალთათვის ახალი და ღირსეული მიზნების მინიჭებისა—ქართულ ლიტერატურაში წილათ ხვდა არა თავ. აკაკი წერეთელს, არამედ მეორე მწერალს, თავ. ილია ჭავჭავაძეს, რომელმაც, ამის გამო, სრული უფლებით პირველი ადგილი დაიჭირა თანამედროვე ქართული ლიტერატურის სათავეში. ამ ორი მწერლის ნიჭისა და როლების შედარება ერთმანეთთან ყველაზე უფრო ვარკვევით დავანახებს თვით თავ. აკაკი წერეთლის მნიშვნელობას, ამიტომ მე ნებას მივცემ ჩემს თავს ცოტათი აცუსე საგანს. როგორც

პოეტს, თავ. ილია ჭავჭავაძეს თავ. აკაკი წერეთლის ნიჭის ნამცეცაც-კი არ მოეპოვება. მისი ლექსები ნახელოვნებია, მძიმე, არა მხატვრული და ბევრი ოფლითა და რიტორიკით გაჟღენთილი. ისინი არა თუ თავისით, ბუნებრივით არ ებეჭდებიან მკითხველის ხსოვნას და შეუწყვეტლათ არ გაისმიან ყურებში, გინდა, თუ არ გინდა მათი დამახსოვრება მაინც, არამედ მაშინც-კი არა რჩებიან ხსოვნაში, როცა მოწაფესავით საგანგებოთ იხუპირებ მათ. საქმის კარგათ მკოდნესთვის ეს ჩემი ნათქვამიც საკმარისია. და, მიუხედავათ ამ უსაზღვრო განსხვავებისა, თანამედროვე ქართული ლიტერატურის ამ ორი კორიფის ბუნებრივ ნიჭთა შორის, მაინც თ. ილია ჭავჭავაძემ, და არა თავ. აკაკი წერეთელმა, დაიჭირა ქართულ ლიტერატურაში პირველი ადგილი და მიცა მას მიმართულება სავსებით სწორი და შეურყვევლი. აზრის ნათელსაყოფათ ისევ შედარებათა ენას მივმართავ—და, მაგალითად, მოვიყვან რუსების მეორე სახელგათქმულ მგოსანს, ნეკრასოვს. ვინ არ იცის, რომ თუ მხედველობაში მივიღებთ ნიჭის მხოლოდ სპეციალურ პოეტურ მხარეს, გრაციის, მხატვრულ სახიანოებისა და უბრალოების მხრით ნეკრასოვი ვერ შეედრება ისეთს მეორეხარისხიან მწერალსაც-კი, როგორც არიან ა. ნ. მარკოვი და გრ. ა. კ. ტოლსტოი. მარა ნეკრასოვის პოეტური ნიჭის ამ თანდაყოლილი სისუსტის მიუხედავათ, ისიც ხომ უეჭველია, რომ მან რუსული ლიტერატურის ისტორიაში, როგორც პოეტმაც-კი, მოიპოვა სრულებით არა მეორეხარისხიანი მნიშვნელობა, რასაკვირველია, არა თვისი ნახელოვნები, უწნოთ მოკრილი, უხეში, ტლანქი და რიტორული ლექსის ფორმით, არამედ მისი შინაირსით, იმით, რომ მან პირველათ შეიტანა რუსულ ლიტერატურაში ის ელემენტები, რომელიც მანამდე ხანდახან და შეუმჩნეველათ, თუ ამოყოფდენ თავს პუშკინისა და ლერმონტოვის ზოგიერთ ქმნილებაში. რადგანაც ეს ელემენ-



ტები რეალურ ცხოვრებიდან არის ამოღებული და საცესებით ეთანხმება მისი სწორი გავითარების საკიროებას, განა უბედურება იქნება, რომ ისინი უხეში საშვალეებითა და ხელოვნური ფორმით იყვენ შეჩხირებული პოეზიაში? ისიც საკმარისია, თუ ჩაბეჭდილება იქნება გამოწვეული, თუ იქნება ჩაგონების ძალა. მაშინ შინაარსის დიადი ძალა და მათი სიკოცხლის უნარი თვით უსულო ფორმითაც კი თავისას ჭაიტანს.

მოგვევლინებიან ახალი მგოსანნი, მხატვრული ალღოთი, „ლექსის არმონიით“ დაჯილდოვებულნი, — აი, ისინი განაგრძობენ დაწყებულ საქმეს და თავიდან აიცილებენ მიმართულების მამამთავრის ნაკულუღევანებებს. რასაკვირველია, პოეტური შემოქმედების ბუნებრივი კანონები შეუბრალებელი და დაურღვეველია. ნეკრასოვს ეს შეენიერათ ესმოდა, როცა მწუხარებით ამბობდა: *ПЬЕНЬ МОЯ БЕЗНАЧНО ПРОЗВУЧАЛА, И ДО НАРОДА НЕ ДОШЛА ОНА*“—ა. (ჩემმა სიმღერამ უკვლოთ გაიხმაურა და ხალხამდი მას არ მიუხწევია). მარტო ეს არის უბედურება. ადრე, თუ გვიან ის ხალხს მიწვდება, თუგინდ შემდგომი დროის მგოსანთა მიერ — „გარდაქმნილი სიმღერების“ მეოხებით, რომელნიც პოეტური აღმოფრენითა და სიტყვის უნაკლულ მოუსიკის ძალით იქნებიან დაჯილდოვებული. ამგვართვე, თუ თავ. ილია ჭავჭავაძის ლექსებმა ვერ მიახწია ხალხს, რომელმაც, საბედნიეროთ, პირდაპირის გზით და ერთბაშით შეითვისა აკაკი წერეთლის ლექსების უმრავლესობა, — მიუხედავად ამისა, ქართველი საზოგადოების გონებრივ ცხოვრებაზე და მის მომავალ გავითარებაზე თავ. ილია ჭავჭავაძის ლექსებმა თითქმის უფრო დიდი გავლენა იქონიეს. მერე, რატომ? საიდან ჩდება ბუნების კანონების ეს ვითომდა დარღვევა? ეს საკითხი არა თუ საყურათლებოა, არამედ დიდათ გამწვრთნელიც, როგორც ახლავ დავინახავთ. შედარეთ ერთმანეთს ორივე ქართველი მწერლის არა მარ-

ტო ნიჭი, არამედ მათი მოღვაწეობაც. ერთი, — შედარებით ნაკლებათ დაჯილდოვებული ბუნებისგან, ყოველთვის შეუსვენებლათ ავარჯიშებდა მთელ თვის ძალ-ღონეს, რო თვისი ნიჭისთვის მიეცა მთელი ის გავითარება და ძლიერება, რომელიც მისაწდომი იქნებოდა მისთვის. ნების, შეურყვევლი ხასიათისა და ცხოვრების მიზნების მპყრობელი, — ის არ შეუშინდა შრომას, ამ უკანასკნელის მთელ სიმძიმესა და უფერულობას. ის სწავლობდა, კითხულობდა სხვა მწერლებს, იკვლევდა ცხოვრების საკითხებს — და თვისი გონებრივი გავითარებით მის თანამედროვე განათლებულ პირებს გაუთანასწორდა. შეიძლება აქ ის საზღვრსაც გადაცთა, როდესაც ისეთ რასმე მოკიდა ხელი, რასაც ამ გონებრივი მუშაობის დროს ყველაზე ძნელათ ერეოდა, რადგან ეს ყველაზე ნაკლებათ შეეფერებოდა მისი გონების თანდაყოლილ თვისებებს, — სახელდობ, გადამეტებულ მსჯელობასა და ფილოსოფიას. მარა ეს არ არის საყურათლებო. უმთავრესი ის არის, რომ მწერალი სწავლობდა, ცოდნით იჭურვებოდა — და მუდამ გარკვევით ახსოვდა მას, რომ თანდაყოლილი ჭკუა მხოლოთ ამ გზით მოიპოებს ბელადობას თანამედროვეებზე, განმავლობას ჩამომავლობაზე.

და მან ყველა ზმას ზედმიწევნით მიაღწია, — მიაღწია იმიტომ, რომ თვის თანამემამულეთა შორის ის იყო თითქმის ერთთო ერთი მოღვაწე ნებით, შეურყვევლი ხასიათითა და შრომის მოყვარობით დაჯილდოებული. შესაძლებელია, ნაკულუღევანებაც ქონდეს, — ბევრ რამეში მე არ ვივინაწილებ მის შეხედულებებს, კვერს არ ვუკრავ მის მოქმედებას, — მარა, მიუხედავად ამისა, ის, უეჭველია, აღამიანია, ის — ძალაა. მისი მაგალითი გვიმტკიცებს, რომ ისეთ სპეციალურ დარგშიაც კი, როგორც არის პოეზია, რომელიც თავის მსახურთაგან, განსაკუთრებულ გრძნობიერობას, განსაკუთრებულ ალღოიანობას, განსაკუთრებულ ნერვებსა და ტინის ითხოვს, — აღამიანს, სრულიათ მოკლე-



ბულს ასეთ მადლს, შეძლება წარმატებით სვლა ღ თვისი კვალის აღბეჭდა უდიდესი სარგებლობით თანამედროვეთა და ჩამომავლობისთვის. მეორემ-კი, ქეშმარიტ ღ გამოჩენილ პოეტათ დაბადებულმა, სრულიათ არ დაატანა თავს ძალა, თვისი შეუღარებელი პოეტური ნიჭი არ აღჭურვა მისი განმავლობის ყველა აუცილებელი ელემენტით ღ; ამატამაც, იგი ვეღარ გაცილდა თვისი შიშველი ბუნების პირველ ყოფილ სიწმინდესა ღ უბრალოებას. ის გვხიბლავს, როცა მისი სიმღერა მოგვესმის, გვხიბლავს, ვით შეუღარებელი ბუღბული, მარა ამით თავდება ყველაფერი. მისი სიმღერა არც მოკვდება, არც დავიწყებას მიეცემა; ოჰ, ეს უტყუარი ქეშმარიტება! მარა მან ქართულ ლიტერატურაში ვერ დაიჭირა ის მთავარი ადგილი, რომელიც მას დაბადებით ეკუთვნოდა. ზარმაცმა მონამ, მან მიწაში დაფლა ღვთის მიერ ბოძებული მძლე იარაღი—და მისი ხალხის ლიტერატურამ ვერ ისარგებლა მისი მოღვაწეობიდან ყველაფერი იმით, რის მოცემაც შეეძლო ამ ბუმბერაზ ტალანტს, „თვისი თავის თვითონვე შემეუსვრელსა და მტერს“, ტალანტს, რომელსაც საკმარისი იყო მხოლოდ ხელი გაენძრია, ეშრომა, როგენიოსობამდი გაზდილიყო. განა უღრმესათ საწყენი არ არის ეს?

მე უკვე ვწერდი ამას წინათ, მ. ვ. სალტიკოვის ნეკროლოგში, თუ როგორი მნიშვნელობა მინიჭა მან თვის ტალანტს მძიმე და შეუწყვეტელი მუშაობით მის სრულსაყოფელათ. განსვენებული სატირიკოსის უახლოესი თანამშრომელი, ნ. კ. მიხაილოვსკიც, საგნის ამავე მხარეს შეგზო თვის წერილში შიქდრინის შესახებ. ჩვენი პუბლიცისტის ამ წერილიდან ვსარგებლობ შემდეგი სტრიქონებით („Руския Вѣдомости“ 1889 года № 119): „მე ყოველთვის მაოცებდა შიქდრინის შრომის მოყვარეობა. თვითონ ისიც ამაყობდა

ამით. ის ამტკიცებდა კიდევ, რომ მან ლიტერატურაში სახელი მოიხვეჭა არა ტალანტის საშეაღებით, რომელიც, მისი აზრით, სრულიებით არ იყო თვალსაჩინო, არამედ განუწყვეტელი შრომით. ერთხელ. ბავშვის აღზდის შესახებ ლაპარაკის დროს ის მარწმუნებდა, რომ მეტათ, თუ ნაკლებ ნიჭიერ მწერლათ ყველას შეუძლია გახდეს,—ს.ჭიროა მხოლოდ ყმაწვილი სიყრმიდანვე შეეჩვიოს წესიერათ და განუწყვეტლათ შრომისო; „რასაკვირველია, თუ ის, ან ილიოტი არ არის, ან მათემატიკოსია“, დაუმატა მან და, მგონია, აქ გულისხმობდა იმ განსხვავებას, რომელიც არსებობს განსაზღვრულ სპეციალურ ნიქსა და სრულ უნიქობის შორის. ვერც ერთსა და ვერც მეორე შემთხვევაში, გავს, ვერაფერს გახდები და მის ფარგლებში კი ყველაფერს მისწვდები შრომით“. დეე, ამ სიტყვებს ჩაუფიქრდეს ყველა ჩვენი ნიჭიერი მწერალი. დეე, მათ ჩიბეჭდონ გონებაში დიდებული მწერლის ეს ანდერძი. მხოლოდთ ნიჭით. მხოლოდთ ტალანტით შორს ვერ წახვალ. როგორც ცეცხლის, ისე უნდა ეშინოდესთ მათ ტაშის ცემის, დიდების და ფიშიაების, რადგან ყველაფერი ეს დამღუბველათ მოქმედობს მწერლის გავითარებაზე. ვით უდიდესი სიკეთე ქვეყნიერებაზე, ასე უნდა შეინახოს მან გულის სიღრმეში სამარადისო უკმაყოფილება თვისი თავით და თვისი ნაწერებით, შეუსვენებლათ უნდა ილტვოდეს ის უფრო მეტისა და მეტი განმავლობის მოპოებისკენ თვის თანამოქალაქეთა უმრავლესობის გონებაზე. ასეთი უკმაყოფილების უქონლობა, შეერთებული თვისი საქმის ზერელეთ შესრულებასთან და თვისი გავითარებისთვის საჭირო სურვილის უქონლობასთან, თხრის საფლავს, რომელშიც უღროდთ დაიმარხა თავი თითქმის ყველა ჩვენმა სამწერლო ნიჭით დაჯილდოებულმა პირმა. პირველი გამარჯვებით დამთვრალნი, ისინი უფრო ხშირათ, ეჩვევიან ბრბოს იაფი ტაშისცემით თვისი სმენის დატკობას და,



როცა ვერ ამჩნევენ მის გაძლიერებულ გრადაციას, ავთომყოფურ გულღვარდლიანობას ეძლევიან. ისინი ვერ იტანენ კრიტიკას, რომელშიც ხედვენ არა გულწრფელ მისწრაფებას მომავალი წარმატებისა და გაუმჯობესებისკენ, არამედ დაფნისა და გვირგვინების მითვისების დაბალ სურვილს. არ ესმით მათ, საბრალოებს, რომ ამ დაფნას და ამ გვირგვინებს, ეკლიანების გამოუკლებლათ, ანიჭებს და ართმევს მათ არა კრიტიკა... ვხედავ, რომ ძალიან ავტოი ჩემს მთავარ სავანს, თავ. აკაკი წერეთელს. ისევ მას დაევუბრუნდები: მარა, რადგან მის დასახისიათებლათ აღგილი აღარ მყოფნის, ამიტომ, სიტყვის შესამოკლებლათ, დაეკმაყოფილდები ერთი შესანიშნავი ლექსის მოტანით, რომელიც ეკუთნის გრ. ა. კ. ტოლსტოის, ყოველი მხრით ნამდვილ მგოსანს, რომელსაც ისეთივე მრავალი ღირსება აქვს, როგორც თავ. აკაკი წერეთელს. რასაც რუსის პოეტი თვის თავზე წერდა, ჩემის რწმენით, საესებით შეეფერება ქართველ პოეტსაც.

აი ეს ლექსი:

„Господь меня готова къ бою,  
 Любовь и гнѣвъ вложилъ мнѣ въ грудь,  
 И мнѣ десницею святою  
 Онъ указавъ правдивый путь,  
 Одушевилъ могучимъ словомъ,  
 Вдохнулъ мнѣ въ сердцѣ много силъ.  
 Но непреклоннымъ и суровымъ  
 Меня Господь не сотворилъ  
 И гнѣвъ я свой истратилъ даромъ,  
 Любовь не выдержалъ свою,  
 Ударъ напрасно за ударомъ  
 Я, отбивая, устаю,  
 На встрѣчу ихъ враждебной вьюгѣ  
 Я вышелъ въ поле безъ кольчуги,  
 И гибну, раненый въ бою!\*(‘‘).

\*) როცა უფალმა ბრძოლისთვის მომიწოდა, მრისხანება და სიყვარული ჩამებერა გულში ლ თვის წმიდა მარჯვენით ქეშმარიტი გზისკენ მიმითითა. ძლიერი სიტყვით აღფრთოვანება მომხადლა მან და უსახლგრო ძლიერება მომანიჭა, მარა შეუპოვარი და მკასრი არ შეუქმნივარ მე უფალს. და ჩემი რისხ-

ობ, თავ. აკაკი წერეთელში რომ იყოს ნების იმდენივე ძალა, რამდენიც მასში ტალანტის ძალა არის, მას რომ ქონდეს თვისი ვალდებულობის სიმძიმისა და ღიდებულობის შეგნება, ვალდებულობისა, რომელიც მას ეკისრება თვით ფაქტით ბუნების მიერ მისთვის ტალანტის მინიჭებისა, ჯერ კიდევ არ იქნებოდა მისთვის დაგვიანებული, რომ თვლემისგან ვათავისუფლებულიყო და მთელი თვისი თვალწარმტაცი ახოვანებით ამართულიყო. ის ჯერ კიდევ არ არის მოხუცებული, და შრომა თვის გასავითარებლათ არაოდეს არ არის დაგვიანებული... მარა მე იმდენათ გულუბრყვილო არ ვარ, რომ ასეთი მოჩვენების მსგავსი იმედებით გავიროთ თავი. რაც უნდა იყოს, მე დარწმუნებული ვარ, რომ მისი როლი, მისი ტალანტი, მისი მნიშვნელობა ქართულ ლიტერატურაში საუკუნო გამწრთენელ მაგალითათ გამოადგება ყველა ჩვენს მომავალ სალიტერატურო სარბიელზე მოღვაწე პირს, რომელნიც ისწავლიან — ჩვენი თაობის ადამიანებზე უკეთ — ხალხისთვის თავდავიწყებულ სამსახურს, ღეთისგან ბოძებულისა და მათ შიერ მონდომებით გავითარებულ ნიჭთა მთელი ძალღონით.

ნ. ნიკოლაძე.

(დასასრული შემდეგ ნუმერში).

## ბ ი ბ ლ ი ო გ რ ა თ ე ი ა .

დ. ახვლედიანი.

ჩარღზ დარუისი. მისი ცხოვრება და სამეცნიერო მოღვაწეობა.

თფილისის წ. კ. გამავრც. სახ. გამეგობა კარგ გზას დადგომია. მას თვისი ხარჯით გა-

ვა უნაყოფოთ ამოვაშრე, სიყვარული ბოლომდი არ შემრჩა; ერთი მეორეზე ამათ ვიგვირებ მტრების იერიშებს — და ვილაღები. მათი მტრული ძალების წინააღმდეგ მე უჯავშნოთ გამოვედი ბრძოლის ველზე და, სასიკვდილოთ დაკოდილი, ვიღუპები.



მოუცია კაცობრიობის სათაყვანებელი შვილის და მეცნიერთა მეფის ჩარლზ დარვინის ცხოვრების აღწერა. წ. კ. საზ. გამგეობა ამ გზას რა განაგრძობდეს, იგი, უეჭველია, დიდ ღვაწლს დადებს ჩვენი ხალხის შეგნებასა და გაკითხარებას. დარვინის ცხოვრების მოთხრობა-კი შეუდგენია ბ-ნს დ. ახვლედიანს. უნდა სიამოვინებთ აღენიშნო, რომ პატივცემულ ავტორს ზედამიწევით შეუსრულებია თვის თავზე ნაკისრი შრომა: დარვინის პირადობა მკაფიოთ დახასიათებულია, ყოველი კერძო და საზოგადოებრივი მოვლენა ამ დიადი ადამიანის ცხოვრებისა აღნიშნულია. აქ სრული და უნაკლებლო სახეა კაცობრიობის საუკეთესო პირადობისა. თვით აღწერა და მოთხრობა სულ უბრალო და მარტივი ენით აქვს შესრულებული. ბ-ნს დ. ახვლედიანს.

არა მგონია, ვინმე ისეთი ქართველი მოიპოვებოდეს, ეს წიგნაკი წაიკითხოს და დიდი სიამოვინება არ მიიღოს. ამიტომ, ჩემი მხრით, დიდ მადლობას ვუძღვნი ბ-ნს დ. ახვლედიანს, რომ შრომა არ დაიზარა და ეს ძვირფასი ძღვენი მისთავაზა ქართველ საზოგადოებას. ამასთანავე ვისურვებ, რომ ამ წიგნაკს ქართველი საზოგადოება ხარბათ დაწაფებოდეს. გარწმუნებთ, რომ ეს დიდათ სასარგებლო იქნება ყველასთვის, რადგან ამ წიგნაკში მკითხველი გაეცნობა კაცობრიობის საუკეთესო შვილის ცხოვრებას. ეს ცხოვრება-კი საუკეთესო ვაკვეთილი იქნება იმისთვის, ვისაც კაცთა სიკეთისა და სათნოებისთვის უძგერს გული, ხოლო სული-კი მისწრაფის...

ახლა-კი, ნება მიბოძეთ, მცირე შენიშვნა ვუძღვნა ამ წიგნაკს ტერმინების შესახებ. ბ-ნი დ. ახვლედიანი ტერმინების შესახებ ძალიან რყევას განიცდის. ერთი და იმავე ცნობის გამოსათქმელათ იგი სხვა და სხვა სიტყვებს ხმარობს. ეს მრავალსიტყვაობას ბადებს, ტერმინის სიმტკიცეს-კი ძალზე ხელს უშ-

ლის. ხანდახან-კი ორი სხვა და სხვა ცნების გამოსათქმელათ ერთი და იგივე ტერმინი ნახმარი. ეს-კი წაიკითხულის გაგებას აძნელებს. ეს ორი გარემოება-კი დიდი მნიშვნელობის ნაკლია ასეთი სახალხო წიგნაკისთვის. ამიტომაც, ჩემ თავს ნებას ვაძლევ, აქ აღენიშნო ტერმინოლოგიის ყოველი ასეთი უხერხულობა.

1. ძუძუთ-ზრდადი (გვ. 20) და ძუძუანა (გვ. 72). ეს ორივე ტერმინი უდრის რუსულს ერთ ტერმინს *млекопитающия*. პირველი ტერმინი პირდაპირი თარგმანია რუსული ტერმინისა, სულმეორე-კი ლათინურისა — *mammalia*. ამიტომ საჭირო იყო, ავტორს, ან ერთს, ან მეორე ტერმინისთვის მიეცა უპირატესობა და ერთ-ერთიც ეხმარა მთელ წიგნაკში. გარდა ამისა, ტერმინს ძუძუიანს სჯობია ტერმინი ძუძუებიანი, რადგან ეს სრულებით შეეფერება ლათინურ ტერმინს, საერთაშორისო მიღებულ ტერმინს, და გარდა ამისა, არც ერთი ცხოველი მოიპოვება, რომელსაც ორი ძუძუ, ან ძუძუს ორი ჯირკვალი არ ქონდეს, თუ კი იგი ცხოველი ნორმალურია და სიმამინჯით დასახინჩრებული არ არის. ამიტომ უნდა მიღებულ იქნეს ტერმინი — ძუძუებიანი.

2. დასამარებული (გვ. 21), დასამარებული-დამიწებული (გვ. 25), დამიწებულ-დასამარებული (გვ. 26), დამიწებული (გვ. 26), ცხოველთა გაქვავებული ნაშთი (გვ. 52), გაქვავებული ძვლები (გვ. 56), დამიწებულ-გაქვავებული (გვ. 56), და დამიწებულ-გაქვავებული სამთხრებლო (გვ. 60).

როგორც ხედავთ, აქ რუსული ტერმინის *ископавшее*-ს გამოსათქმელათ მთელი ლექსიკონია ნახმარი. აღარ იცი, რომელი ამ ტერმინთაგანი არის საუკეთესო და, ამიტომ, სამუდამოთ სახმარიც. ეს-კი ტერმინოლოგიის დიდი ნაკლია. მგონია, და ეს კიდევ ვრცლათ



განემარტე ჟურნალ „განათლებაში“ (იხ. 1908 წ. № 7—8), რომ ეს მრავალ-სიტყვაობა უნდა უკუვადგოთ და საბოლოოთ მივიღოთ ტერმინი—სამთხრებლო.

3. გვართა წარმოშობა, მოდგმათა წარმოშობა (გვ. 28). ან ერთი, ან მეორე. უმჯობესია, ვიხმაროთ გვართა წარმოშობა.

4. მოშინაურებული ცხოველები და შეკუთებული მცენარეები (გვ. 32). დამეთანხმებით, რომ ყოვლით უვარგისია შეკუთებული მცენარეებს ხმარება. ამ სიტყვებით აღინიშნება აქ რუსული გამოთქმა: *воспитанные растения*. ამ სიტყვით ავტორს უნდა აღნიშნოს ის მცენარეები, რომელნიც აღამიანს მოშენებული, ან გაშენებული აქვს და რომელთაც იგი თვის ბაღში, ეზოში, თუ ყანაში რგავს, სთესს და მოყავს. ასეთი მცენარეების შესახებ შეკეთების თქმა არ შეიძლება, რადგან სიტყვა შეკეთება ნიშნავს *ремонт*-ს. ამიტომ, მგონია, უნდა ვიხმაროთ: მოშენებული მცენარეები.

5. „ცვარედინებზე მივატოვე ცთა, ვმუშაობ ჯვარდიან განაყოფიერებაზე“ [გვ. 33]. სიტყვა ცვარედინი რამდენჯერმე შეხვდება მკითხველს წიგნაკში. მგონია, ეს კორექტურული შეცდომა უნდა იყოს, რადგან სრულებით არ ვიცი, თუ რას ნიშნავს, ან რა არის ცვარედინი. რაც შეეხება ჯვარდინ განაყოფიერებას, უნდა შემდეგი მოვახსენოთ.

ჯვარდინი განაყოფიერება პირდაპირი თარგმანია რუსული ტერმინისა—*скрещеніе*. ეს უკანასკნელი-კი პირდაპირი თარგმანია ფრანგული ტერმინისა: *croisement*. ამ ტერმინის სინამდვილე რო გავითვალისწინოთ, უნდა წარმოვიდგინოთ, რო ჩვენი თვალის წინ დგას ორი სხვა და სხვა გვარის დედალ-მამალი ცხოველისა, მხოლოთ-კი ამ რიგათ: წინ დგას ერთი გვარის დედალი ცხოველი, ამის უკან-

კი ამავე გვარის მამალი ცხოველი, ამათ გვერდით-კი მეორე გვარის დედალი ცხოველი და ამ უკანასკნელის უკან-კი ამავე გვარის მამალი ცხოველი. ახლა, იმის მაგიერ, რომ ერთი გვარის მამალი ცხოველი, რომელიც იმავე გვარის დედალი ცხოველის უკან დგას, ამ დედალ ცხოველზე-კი არ გავიდეს, რაიც სრულებით ბუნებრივია, არამედ ვაიძულოთ გავიდეს მეორე გვარის დედალ ცხოველზე, რომელიც ამ მამალს წინ-კი არ უდგია, არამედ წინ, მარა ამავე დროს მარჯვნივ. ასევე უნდა მოვქცეთ მეორე წყვილს სხვადასხვა გვარის დედალ-მამალს. ეს შეუღლება-კი რო ნახატით წარმოვიდგინოთ, ჩვენ წინ აღიბეჭდება ჯვარის მსგავსი ფიგურა. აი, სწორეთ, ამიტომაც, ამ შეუღლებას, ამ აღრევას ფრანგებმა უწოდეს—*croisement*, ხოლო რუსებმა პირწმინდათ გადმოთარგმნეს. როგორც ხედავთ, აქ რთული გარემოების წარმოდგენა საჭიროა. ამ მომენტის, ამ გარემოების აღსანიშნავათ-კი ქართული ლექსიკონი ხმარობს სიტყვას—დაგრილება, რადგან ცხენის და ვირის აღრევას ხალხი ასე უწოდებს. ამიტომ ჯვარედინი განაყოფიერების მაგიერ უნდა ვიხმაროთ ნამდვილი ქართული ტერმინი: დაგრილება.

6. არა-ორგანოვანი (გვ. 23), ორგანოვანი ბუნება (გვ. 60) და ორგანიული ბუნება (გვ. 61). ან ერთი, ან მეორე ტერმინი უნდა ვიხმაროთ. ჩემი აზრით-კი უმჯობესია, ვიხმაროთ—აღვანაული ბუნება.

7. წყალ ვარდნილი (გვ. 23). უნდა თავი დავანებოთ ასე უხეშათ გადმოთარგმნილ სიტყვებს და ვიხმაროთ ნამდვილი ქართული გამოთქმა: ჩანჩქერა.

8. ასცილიათა მატლები (გვ. 68) და ნიდაგის შემუშავება მატლებით (გვ. 76). როგორც ხედავთ, აქ ერთი და იმავე სიტყვით—მატლები—გამოთქმულია ორი სხვადასხვა ცნება: *личинка* და *червь*. პირველ შემთხვევა-



ში სრულებით შესაფერისია სიტყვა მატლი, ხოლო მეორეში-კი უნდა ჭია ეხმარა ავტორს, რადგან დარჩენილი სწორეთ კიათა მნიშვნელობა გამოიკვლია ნიადაგის დამუშავებისა და დეფორაციების საქმეში და რადგან კიასა და მატლს საერთო არა აქვთ რა.

9. ჩასახლება (გვ. 57). წინათ ხმარობდენ, ხოლო ზოგი ახლაც ხმარობს სიტყვას — ჩანასახი. მე ეხმარობ ტერმინს — განსახლება. მგონია, ეს ტერმინი უმჯობესია და სინამდვილესაც უფრო აღნიშნავს, რადგან ჩანასახი და ჩასახლებაც იმ ფაქტს აღნიშნავს, რომ მამალი ცხოველი დედალს დაუკავშირდება და მხოლოდ ამით ჩიასახება ახალი ცხოველის აგებულობა. ეს ტერმინი აღნიშნავს ისეთ პროცესს, რომელიც ამ ნაირათ გარედან შიგნით წარმოებს. მარა არის უამრავი ცხოველი, მაგ. ფილოქსერა, სადაც ეს პროცესი ასე როდი წარმოებს. აქ ახალი ცხოველის აგებულება დედალი ცხოველის სხეულში თავისთავათ განსახლება (ყოველად შეუძლებელია აქ ვიხილოთ ჩიასახება) და ისე გავითარდება. ამიტომ ტერმინი განსახლება უფრო ზედ-მიწევნით აღნიშნავს პროცესის ზოგადობას, ამიტომაც ეს ტერმინია მისაღები.

10. ნაკუჭა (გვ. 61) — желудочек. ეს ტერმინი აღნიშნავს გულის წვერს. მგონია, რომ ქართველთაგან ვერაინ დათანხმდება, რომ გულს კუჭის რაიმე მსგავსება ემჩნეოდეს. ამიტომ, მგონია, რომ გულის წვერის აღსანიშნავათ ეს ტერმინი ყოველათ გამოუსადეგარია. უნდა შეთანხმებით რომელიმე ტერმინი საერთოთ მივიღოთ. მე ნახმარი მაქვს გულის ნაწილების აღსანიშნავათ: წინა-გული — предсердие და უკანა-გული — желудочек. (იხ. ჩემი თარგმანი ფიზიოლოგია). ეს ჩემი ტერმინი იმით არის გამოწვეული, რომ ლათინურათ предсердие ს atrium ქვია, რომელიც

ამავე დროს რომაელების სიტყვაში ნიშნავდა სახლის აივანს, წინ-კარს. ამიტომ მეც ასე დავანაწილე: წინა-გული და უკანა-გული. გარდა ამისა, ამ ტერმინის სინამდვილე იმითაც მტკიცდება, რომ გული არის შუა ადგილი სისხლის მიმოქცევისა და ტრიალისა. ამიტომ სისხლის ყოველი ნაწილი და ამ სისხლის სირსვლები თვისი მიმოქცევის დროს პირველათ წინა-გულს შეხვდებიან და მას გაივლიან, მერე-კი აქიდან უკანა-გულში შევლენ და იქიდან გამოვლენ. ამიტომ სისხლისა და სისხლის სირსვლებისთვის предсердие წინა-გულია, წინ გასასვლელია, ხოლო желудочек-კი უკანა-გულია, უკან, ან მერე გასასვლელია.

ამიტომაც, მგონია, ამ ტერმინებზე უნდა შევჩერდეთ, რადგან ნაკუჭა სრულებით ამას არ შეეფერება, არ შეეხამება და ყოველი მკითხველიც ამ სიტყვის წაკითხვის დროს, უეჭველათ, წარმოიდგენს, რომ ეს ნაკუჭა რაღაც პატარა და მცირე კუჭიაო, რომელიც ამასთანავე კუჭში, ან კუჭთან დაკავშირებული უნდა იყოსო. ეს-კი აზრთა არევის გამოიწვევს.

საჭიროა და უცილობელიც ტერმინების საზოგადოთ ხმარება. ამისთვის-კი საჭიროა ჩვენს შორის იღუმალი შეთანხმება მოხდეს, თორე ტერმინების უხერხულობა როდი შეგვიშლის ხელს. ამის მაგალითებს რუსული ტერმინოლოგიიდან სახელდახელოთ აქ მოვიტან. რუსული ტერმინი желудок — კუჭი და желудочек უკანა-გული, გულის წვერი სრულებით გამოუსადეგარი ტერმინებია მართლაც, ამ სიტყვებს თუ გავარჩევთ, აღმოვაჩენთ, რომ ეს ორივე სიტყვა ნიშნავს რკოს — желудь. აქიდან-კი კინობითი სახელია წარმოდგარი — желудок და კიდევ უფრო დაკნინებული სახელი — желудочек. ახლა იკითხეთ, რა აქვს საერთო რკოსა, კუჭსა და გულს?!



არაფერი. მარა ახლა რუსული ლიტერატურა ამის უხერხულობას, ამის შეუფერებლობას როდი ამჩნევს, არც უკვირდება ამას. ერთხელ ასეა მიღებული, მორჩა და გათავდა!

ან რუსული *пищеварительный канал* რა გამოთქმაა? სრულებით სინამდვილეს არ შეეფერება. პირდაპირ რო გადმოვთარგმნოთ, იქნება: საჭმლის მომხარშველი მიწი. ახლა ყველამ იცის, რომ ჩვენი კუჭი და ნაწლავები საზრდოს როდი ხარშვენ, არამედ ინელებენ, ითვისებენ. მოხარშვით-კი საჭმელს ჩვენ ქვაბში, ან ქოთანში ვხარშავთ. აი, ასე უხერხულია რუსული ტერმინოლოგია-კი. მარა ეს არავის ხელს არ უშლის და იქ ტერმინების ერთგვარობა ვაბატონებულია. ვერც ვერავინ გაბედავს ამ ტერმინების უხმარობას, თუმცა, უეჭველია, ბევრი რუსი დიდაც არ არის და არც იქნება კმაყოფილი ასეთ უხერხული და შეუფერებელი ტერმინებისა. ჩვენც ასე უნდა მოვიქცეთ და ნამეტანს ნუ ჩაუჯიკიკიტლებით ტერმინებს: ვიხმაროთ ერთხელ ვისგანმე. ხმარებული და ამით ეს ტერმინი გავავრცელოთ. საქმე და სწორეთ დიდი საქმეც თვით ეს გავრცელება, ეს საზოგადოთ, საერთოთ ხმარებაა სამეცნიერო ტერმინებისა.

ი.გ. ფანცხავა.



## ახლო აღმოსავლეთი.

(იხ. „განათიადი“ № 3).

პეტრე დიდის ხელმწიფობის დრომდით, მთელი კასპიის ზღვის ირგვლივ არე-მარენი მარტო სპარსეთს ეკირა ხელში. პეტრე დიდმა გულით მოინდომა რუსეთის ვაჭრობისა და აღებ-მიცემობის გაძლიერება აზიის შუაგულში და დიდი ინდოეთისკენაც გზა უნდა გამოენახა

ამ საქმისთვის.. ამიტომ მან სპარსეთს ომი აუტეხა და წაართვა სპარსელებს ქ. ქ. დერბენტი, ბაქო და სხვა.

სწორეთ იმ დროს, რა დროსაც მოისპო პოლიტიკურათ პოლონეთი, გარდასწყდა აქ, აზიაში მეორე კულტურული მრავალ-ტანჯულ საქარისტანო უერის, საქართველოს ბედიც. 1801 წელს ქართლ-კახეთის სამეფო შეუერთდა თვისი ნებაყოფლობით რუსეთის იმპერიას და, შემდეგ, 1810 წლამდით დასრულდა იმერეთის სამეფოს შეერთებაც და სხვა ჩვენი სამთავროებისაც\*). ამ დიდმა ისტორიულმა ამბებმა საშინლათ ვააბოროტა სპარსეთი და ოსმალეთი და დიდათ საწყენი შეიქნა ინგლისელებისთვისაც...

1809 წელს დასრულდა ომი შვეციასა და რუსეთს შორის და რუსეთმა შემოიერთა აღმოსავლეთის კუნძულები და ფინლიანდია, რომელსაც ხელმწიფე ალექსანდრე I მიანიჭა პრივილეგიები და უბოძა ტიტული დიდი სამთავროსი.

სწორეთ ამავე დროს რუსეთს ომი ქონდა ატეხილი ოსმალეთთან. მოწინააღმდეგე მხარეებმა ზავი შეკრეს ქ. ბუქარესტში და რუსეთმა მიიკრა მთელი ბესარაბია და საზღვრათ დაინიშნა მდინარე პრუტი.

1815 წელს ევროპის სახელმწიფოთა მონარქნი და მათი მინისტრები ქ. ვენაში შეიკრიბენ და ამ კონგრესის გადაწყვეტილების ძალით რუსეთმა მიიღო პოლონეთის ის მიწა-წყალი, რაც პრუსიამ მიიკრა უკანასკნელის მეორე და მესამე განაწილების დროს. რუსეთის იმპერატორმა დასტავა ტიტული პოლონეთის სამეფოსი და ამიერიდან რუსეთის იმპერია დიდი ბრიტანიის სახელმწიფოს შემდეგ მიწა-წყალით შეიქნა ერთი უდიადესი სახელმწიფო, რომელსაც უკირავს შეექვსედი ნაწილი მთელი დედამიწის ზურგისა.

1826 წელს ატყდა სპარსეთსა და რუსეთს შორის ომი, რომელმაც რუსეთს შესძინა ოცი მილიონი კონტრიბუცია, ქ. ქ. ერი-

\*) იხ. განხვეწებული მიხეილ ხელთუფლიშვილის მონოგრაფია: „Вступление Грузии въ составъ Россійской Имперіи“.



ვანი, ნახევანი და მთელი ის მიწა-წყალი, რომელიც მდინარე არეზის მარცხენა მხარეზე ძვეს. ამასთანავე სპარსეთს აეკრძალა კასპიის ზღვაზე ფლოტი იყოლიოს და რუსეთის ვაჭრებს მიეკათ დიდი უპირატესობანი სპარსეთში...

სწორეთ ამ დროსვე ატყდა ომი რუსეთსა და ოსმალეთს შორის იმიტომ, რომ რუსეთმა თვისი ფლოტი მიაშველა საბერძნეთს, რომელიც თვისი პოლიტიკურათ გათავისუფლებისთვის გმირულათ ებრძოდა გამძვინვარებულ ოსმალეთის ბატონობას\*). საბერძნეთი ვერ გათავისუფლდებოდა ოსმალების ბატონობისგან, რადგან ხელმწიფეებმა მას ზურგი შეაქციეს, რომ ევროპის განათლებულ ჯალს მისთვის თავი არ გამოედო. მთელი ევროპის პრესის და საზოგადო აზრის სიმპატიები და მხურვალე თანაგრძნობა აშკარათ საბერძნეთს მიემხრო და ყოველგან ინგლისში, საფრანგეთში, გერმანიაში, ინდოეთში, პოლონეთში და სხვაგანაც გამოვიდნენ თავდადებული მებრძოლნი საბერძნეთის თავისუფლებისთვის. ინგლისში მოაწყვეს დიდი საზოგადოება, ასე წოდებული, „ჰელინელთა მოყვარულისა“ (ჰელინოფილები). ამას მიბაძეს ევროპის დანარჩენმა ერებმაც და გააწყვეს ყოველგან თავისუფლებისთვის მებრძოლა რაზმები და გაემართნენ შვენიერი ელლადის არე-მარეზე დიდი ბრძოლისთვის სისხლის დასადვრელათ. თვით ლონდონში გადაწყვიტეს, რომ სამი მილიონი მანათი ასესხონ საბერძნეთს ომის გასაგძელებლათ. საქვეყნოთ სახელგაოქმულმა დიდი ბრიტანიის მგოსანმა, ლორდმა ბაირონმა ბრძოლაში მონაწილეობა მიიღო და ერთი წლის განმავლობაში იგი იქ ჭაობის ციხეში ისხვერპლა. ინგლისის მთავრობას გულში შიში ჩაუვარდა, რუსეთმა ომი არ გამოუტყხად ოსმალებს და სტამბოლი არ დაიპყროს. ამიტომაც იგი ჩაერია საბერძნეთის საქმეში და საფრანგეთისა და რუსეთის შეთანხმებით შეუთ-

ვალეს ოსმალეთს, საბერძნეთი შეირიგე და შინაურ საქმეებში თავისუფალი გამგეობის ნება, ე. ი., ავტონომია მიეცია. ამაზე ხევანთქარმა უარი განაცხადა. მაშინ რუსეთმა, ინგლისმა და საფრანგეთმა შეერთებული ფლოტი გაგზავნეს და ნავარინთან მთელი ეგვიპტის ფლოტი ააფეთქეს. 1828 წელს რუსეთმა ომი გამოუცხადა ოსმალეთს და რუსეთის ჯარებმა თითქმის უომრათ აიღო ქ. აღრიანოპოლი და ხონთქარმა მამად III ზავი შეკრა იმპერატორ ნიკოლოზ I 1829 წელს. ამ ომმაც შესძინა რუსეთს: ევროპისკენ მღ. დუნაის ზღვის შესართავთან ქ. ქ. იზმაილი და კილიო, აქეთ აზიაში ქ. ქ. ფოთი, ახალციხე და სხვანი. საბერძნეთი სრულიათ გათავისუფლდა პოლიტიკურათ ოსმალეთის მონობისგან და სხვა ქრისტიანთა ბედ-იღბალიც გაუმჯობესებულ იქნა ამიერიდან ოსმალეთში...

1852 წელს რუსეთის იმპერატორი ნიკოლოზ I პირდაპირ ეუბნებოდა ინგლისის გამოჩენილს ელჩს: „ავათმყოფი აღამიანი (ვითომ ოსმალეთიო) სამარეს უახლოვდება და საქირთა ჩვენ შევთანხმდეთ მის შესაფერ დასამარხავათო“. და ამასთანავე უმატებდა, რომ ოსმალეთის შესახებ ჩემს კაბინეტში ორნაირი აზრი ტრიალებსო, ერთი, — რომ იგი უკვე მოკვდა, მეორე — რომ იგი ახლა კვდებაო...

ახლა რუსეთი აღარავის წინაშე აღარ მალავდა და საქვეყნოთაც ამბობდა, რომ მას ძალიან წყუროდა დიდი კლასიკური კონსტანტინეპოლის დაპყრობა და ბიზანტიის იმპერიის ნანგრევებზე გაბატონება...

1853 წელს რუსეთსა და ოსმალეთს შორის ჩამოვარდა დიდი განხეთქილება და მტრობაც. ამის მიზეზი იყო ის გარემოება, რომ რუსეთი გამოექცა პალესტინაში მართლმადიდებელთა უფლებების დაცვას. მარა ამაზე რუსეთის იმპერატორს ნიკოლოზ I დიდი უარი მოახსენა ბრწყინვალე პორტამ. ამას მაშინვე მოყვა, ასე წოდებული, ყირიმის ომის გამოცხადება და რუსეთის ჯარებმა ზაფხულშივე 1853 წელს გადალახეს საზღვრები და დაიპირეს მალდავია და ვალახიას სამთავროე-

\*) იხ. „საბერძნეთის გათავისუფლება“; სტატია დავით კარიჭაშვილისა; რომელიც დასტამებული იყო ჟურ. „ივერიაში“ 1883 წ.



ბი. ამის შემდეგ კი რუსეთის შავი ზღვის ფლოტმა აღმირალ ნახიშოვის მეთაურობით სრულიათ მოსპო ოსმალეთის ძლიერი ესკადრა ქალ. სინოპთან.

იმ წამსვე დიდი ბრიტანიის უძლიერესმა მთავრობამ და საფრანგეთმაც იგრძნეს, თუ რა დიდი უბედურობა მოელოდა ოსმალეთს „ჩრდილოეთის კოლოსისგან“ და 1815 წლიდან დაწყებული შვიდობიანი კონცერტი ევროპის დიდ სახელმწიფოთა შორის დამყარებული, ახლა პირველათ დაიარღვა და ყირიმის ომში რუსეთის საბედისწეროთ მის დასატაკებლათ ჩაებრინა. დიდი ბრიტანიის და საფრანგეთის იმპერატორს ნაპოლეონ III, რომელსაც დიდი ჯავრი სჭირდა რუსეთისა, მიემხრო სარდინია და ავსტრია, რომელმაც რუსეთს არ დაუმხსნოვრა ის გარემოება, რომ ავსტრიამ რუსეთის ჯარებით გასრისა უბედური ვენგრელები ერთ დროს... ამგვარათ, რუსეთი ჩავარდა დიდ გამწარებულ, აუწერელ მღვამარეობაში.

რუსეთის უძლიერესმა მტრებმა ყოველის მხრით შეკრეს იგი. რუსეთის მოწინააღმდეგეთა ფლოტი გაჩნდა შავ ზღვაშიაც, თეთრ ზღვაშიაც და შორს კამჩატკის ნაპირებზეც, ინგლისის და საფრანგეთის საშინარი ფლოტი თვალის დახამხამების უმაღლვე დაიბადა ყირიმში, ევპატორიის ქალაქთან. რუსეთის არმიის სარდალი თავადი მენშიკოვი მდ. აღმის ნაპირებზე შეხვდა მტერს. მარა საშინლათ დამარცხდა იგი და უკან დაიხია. ამავე დროს ძლიერ-მოსილი ფლოტი რუსეთის მტრებისა მიადგა სევასტოპოლს, რომლის ყურეში სრულიათ ჩაკეტა რუსეთის შავი ზღვის ფლოტი. თერთმეტი თვე გაგძელდა უსაშინელესი სისხლის ღვრა, რომელმაც დააუძლორა რუსეთი და თითქმის წელშიაც ვასწყვიტა იგი. რუსეთს ამ დროს არ გააჩნდა, არც ხეირიანი გაქრილი გზები, არც რკინის გზის სახსენებელი იყო მაშინ რუსეთში, თუ არ მივიღებთ მხედველობაში ერთათ ერთ რკინის გზას, რომელიც იყო გაყვანილი მოსკოვისა და პეტროგრადს შუა.

1855 წელს, 1 თებერვალს გადაიკვალა რუსეთში ხელმწიფე ნიკოლოზ I და ტახტზე ავიდა იმისი შვილი, ალექსანდრე II. ყირიმის ომი ამ ხელმწიფის გამეფების შემდეგაც გაგძელდა. მარა 28 აგვისტოს მტრის შეერთებულმა ძლიერმა ფლოტმა სულერთიანა განადგურა სევასტოპოლი და ამ მხარეზე ძლიერი გამარჯვებით დაავიგრვინა ომი.

კავკასიის აქეთა მხარისკენ ბრძოლის ველზე უფრო მარჯვეთ მიყავდა საქმე რუსის გენერლებს ბებუთოვს და მურავიოვს, რომელმაც ყარსიც კი აიღო. მარა სახელოვანი ომერ ფაშის მეთაურობით ოსმალეთის ჯარი შიგ შუაგულ ჩვენს ქვეყანაში შამოაქრა დიდის ამბით და ცხენის წყლის პირამდიც მოვიდა. ქუთაისს, მიუცილებლათ, განადგურება მოელოდა... მარა ერთბაშათ ომი შესწყდა და 1856 წელს, 18 მარტს შავი ჩამოვარდა. პარიზის ტრაკტატის ძალით, რომელმაც აიძულა რუსეთის მთავრობა ყმები გაეთავისუფლებია, მდნარე ღუნაის შავს ზღვასთან შესართავი ოსმალეთმა წაიღო, შავი ზღვა ნეიტრალურ ზღვათ გამოცხადდა და ყველა ნაციის სავაჭრო გემებისათვის ამიერიდან იგი ღია შეიქნა. რუსეთს პირობა დაადებოეს, რომ იგი სამხედრო ფლოტს შავს ზღვაზე არ იყოლიებდა და სხვა.

ამნაირათ, როგორც ხედავთ, „ავათმყოფი ადამიანის“ უდროვოთ დამარხვაზე საუბარი ძალიან ნადრევი გამოდგა და ყირიმის ომში ისე ძლიერათ და საშინლათაც დამარცხდა რუსეთი, რომ ალექსანდრე II რეფორმებს არ ეხსნა იგი, ვინ იცის, ან ვინ გაითვალისწინებს დღეს იმას, თუ რა უნდა მომხდარიყო ამ უშველებელს, უვიცს და დამშეულს ქვეყანაში...

ჩემი სტატიის პირდაპირ საგანს, რასაკვირველია, არ შეადგენს იმის აღწერა, თუ რა მიწა-წყალი შეიძინა რუსეთმა ალექსანდრე II ხელმწიფის დროს. მარა სიტყვამ მოიტანა აქ და, ბარემ, აღწუსხოთ მხოლოთ შეძენილი ქვეყნების დასახლებაც.



ყირიმის ომის შემდეგ, რუსეთმა შორეულ მოსავლეთში ჩინეთიდან შეიძინა მდინარე ამურის მარცხენა მხარეზე მდებარე ადგილები და აგრეთვე მთელი ზღვის ნაპირები იაპონიის ზღვამდის. აქ, ამ ადგილებში გაშენდა ორი ქალაქი: ნიკოლაევი და ვლადივსტოკი.

შემდეგ რუსეთმა დიდის გაქვირებით, როგორც იქნა, დაამარცხა კავკასიის არწივი-შამილი და, ანაირათ, დაიმორჩილა კავკასიის მთების შვილებიც...

ამას შემდეგ, კასპიის ზღვის იკითა მხარეებისკენ დაიწყო რუსეთმა ომები და დაიმორჩილა ხივის, კოკანის და ბუხარას სახანოები და დაარსა იქ თურქესტანის საგენერალ-გუბერნატორო არე-მარენი.

ყველა ეს ქვეყნები მდინარეებზე სირდა-რიასა და ამულარიაზე არიან გაშლილი. იმპერატორის ალექსანდრე 2 ხელმწიფობის დროსვე გენერალმა სკობელევმა შემატა რუსეთს ახალ თეკინის ვრცელი მიდრეები და ალექსანდრე III ხელმწიფობის დროს თვის ნებით შეუერთდა რუსეთს მდინარე მურდაბის არე-მარეზე მდებარე მდიდარი მერვის ოაზისი.

ამ ადგილების შეძენით რუსეთი ძალიან დაუახლოვდა დიდი ბრიტანიის უმდიდრეს სამფლობელოს, — კლასიკურს ინდოეთს და ეს გარემოება შეიქნა მიზეზი იმისა, რომ ინგლისის საზოგადოების აზრი, მისი შორსმკვრეტი მინისტრები შიშითა და დიდის გულის ძგერით შესცქერიან ორთავიან არწივის ასეთს თავდაუქერელს აგრესიულს პოლიტიკას...

სწორეთ იმ დროს, როცა რუსეთი აზიის შუაგულ არე-მარეზე თვის სამფლობელოს იფართოვებდა, ევროპის შუაგულ ხმელეთზე მოხდა ფრიად დიდმნიშვნელოვანი ამბავი: პრუსიის სახელოვანმა მეფემ ვილჰელმ 1 გერმანიის იმპერია სულ მთლათ გააერთიანა. საფრანგეთის იმპერატორი, ნაპოლეონ 3 დიდ

წინააღმდეგი შეიქნა გერმანიის იმპერიის გაერთიანებისა და პრუსიას ომი გამოუცხადა. როგორც მოგვხსენებთ, ამ ომში ნაპოლეონ 3 საშინლათ დამარცხდა, ფრანგებმა იგი წამსვე ტახტიდან ჩამოაგდეს და თავის შეენიერს, მდიდარ ქვეყანაში რესპუბლიკა დააარსეს. მეფე ვილჰელმი-კი 1871 წელს მოკავშირე მეფეებმა გერმანიის იმპერატორათ გამოაცხადეს...

რუსეთის იმპერატორმა ალექსანდრე 2 ამ ომში დიდი დახმარება გაუწია გერმანიას, რომ იგი არ გაერია, ასე წოდებული, სრული ნეიტრალიტეტი დაიცვა და გერმანიის იმპერატორს ვილჰელმს 1 საშინლათ დაამარცხებინა საფრანგეთის იმპერატორის ნაპოლეონ 3 მხედრობა. ამიტომაც, იმპერატორს ვილჰელმს 1 ხმაც არ ამოუღია, როცა რუსეთის იმპერატორმა ალექსანდრე 2 1871 წელს პირველ ხარისხოვან სახელმწიფოებს გამოუცხადა, რომ მელთაც პარიზის ტრაქტატს ხელი მოაწერეს, რომ იგი საქიროდაც აღარა თვლის რუსეთის ხელის შემშლელი პირობანი ამ მორიგებისა (77 პარაგრაფი) ამიერიდან ძალაში დასტოვოს. ყველას მუცელში ენა ჩაუვარდა, ხმა ვერ ამოაღო ვერავინ და რუსეთმაც სევასტოპოლში მაშინვე ხელი მიყო შავი ზღვის სამხედრო ფლოტის დაარსებას, არსენალების, ციხეების და დიდ-დიდ ჯაშენიან გემების გაკეთებასაც...

როგორც ზევითაც მოგახსენეთ, კინარჯისკის შერეგების დროს, რომელიც მოხდა 1774 წელს, პირველ ხარისხოვანმა სახელმწიფოებმა რუსეთს ნება მისცეს ოსმალეთის მართლმადიდებელ ქრისტიანეთათვის მფარველობა გაეწია. თუმც ეს მზრუნველობა 1856 წელს პარიზის ტრაქტატმა ევროპის სხვა დიდ სახელმწიფოებსაც მიანიჭა, მარა რუსეთი უფრო ექომაგებოდა მართლმადიდებლებს ოსმალეთში, რადგან უნდოდა იმათი გულის მოგება თვისი სახელმწიფო დიდი მიზნების გასა-



ხორციელებლათ. ოსმალეთის ბაშბუზუკნი მუდამ ტანჯავდნ და არბევდნ ბალკანეთის სლავიანებს, ცარცვადნ საქრისტიანო ტაძრებს და მონასტრებს, კლავდნ ვაშკაცობას და ჩვილ ყრმებს, მიყავდათ ქალები და ქალიშვილები და იღვა ერთი უშველებელი წამება და ჯოჯოხეთი. ბოსნიასა და გერცოგოვინის სერბებმა ვეღარ აიტანეს ეს ამბავი და აჯანყდნ. ამათ მიენმარა სერბიელების სამთავროები—შავგორეთი და სერბია, რომელნიც ოსმალთა ბატონობას არასდროს ქედს არ უხრიდნ, არასდროს არ ურიგდებოდნ. რუსეთის იმპერატორის, ალექსანდრე I მეფობის დროს მიენიჭა ოსმალთაგან თავისუფლება სერბებს, რომელთა მთავარი მხოლოდ სახელმწიფო გადასახადს უხდიდა ოსმალეთს. იმპერატორმა ალექსანდრე II ხვანთქარს თხოვა ოსმალთა ბაშბუზუკებისგან ეხსნა მართლმადიდებელი სლავიანები. მარა, რაკი თხოვნამ არ გასჭრა, რუსეთის იმპერატორმა ომი გამოუცხადა ოსმალეთს. ამ რიგათ, დაიწყო რუს-ოსმალოს ომი (1877 78 წ.), რომელიც მოძმე—სლავიანთა პოლიტიკურათ გათავისუფლებას ისახავდა მიზნათ, როგორც რუსეთის მთავრობა ქვეყნიერებას არწმუნებდა შინ და გარეთ. რუსეთში იმ წამსვე ბალკანეთის სლავიანთა გათავისუფლების საზოგადოება დაარსდა და ატყდა დიდი ამბები... 1877 წელს რუსეთის ერთმა არმიამ დიდი მთავრის ნიკოლოზ ნიკოლოზის ძის მთავარსარდლობის მეთაურობით გადიარა მდინარე დუნაი და შევიდა პირდაპირ ბულღარიაში. მეორე არმია დიდი მთავრის მიხეილ ნიკოლოზის ძის მთავარსარდლობის მეთაურობით მიადგა ბათომს და ყარსის ციხეს.

მიხეილ ტარიელის ძე ლორისმელიქოვმა აიღო ძლიერი ყარსის ციხე და ბათომაც აღებული იქნა. ბულღარიაშიკი ამ დროს მოხდა დიდი შემადრწუნებელი ამბავი. მთელი რუსეთის მხედრობას განის გზით შეეჭრა საქვეყნოთ სახელგათქმული ოსმან ფაშა ქალ. პლენაში და უნდოდა მთელი რუსეთის დიდი არმია ზედ შუაზე გაეჭრა. ამ საოცარმა სარდალმა

ორჯელ საშინლათ, პირდაპირ საარაკოთ დაამარცხა რუსის გენერლები კრიდნერი და სკობოლვევი. ორი თვის განმავლობაში მას უშველებელ შიშში ყავდა მთელი რუსის ბალკანეთის არმია და იმისი ბედი ბეწვზე ეკადა, რომ უგანათლებულეს თავადს ალექსანდრე ბაგრატიონს („იმერეტინსკათ“ წოდებულს და შემდეგ ვარშავის გენერალ-გუბერნატორს) არ ეხსნა იგი. ამ დროს, აქვე, ბრძოლის ველზე ბძანდებოდა თვით რუსეთის ხელმწიფე ალექსანდრე II. ალექსანდრე ბაგრატიონმა შეთხზა სრულიათ ახალი სამხედრო გეგმა. დიდი ოსმალეთის გამძვივარებულ ლომს—ოსმან ფაშას გარს შემოერთყა და მთელი თვისი მხედრობით ტყვეთ წამოიყვანა იგი. ამ დიდი სარდლის, ალექსანდრე ბაგრატიონის საქმე იყო აგრეთვე თვით ბალკანეთის ქედებზე საოცარი გაბედული გადასვლა რუსეთის არმიისა და კონსტანტინეპოლის ალაყაფის კარებაში ძლიერი იერიშების მიტანაც...

პლენის აღების და ოსმან ფაშის ჩამოშორების შემდეგ, რუსეთის მხედრობამ თავი აიშვა, გაიარა შიკა დეკემბრის თვეში, რომელსაც იცავდა ოსმალეთის არმია თავიდან ფეხებამდი შეიარაღებული ინგლისის საომარი იარაღებით, სურსათით, ფულებით და იმათი აფიცრებითაც. ოსმალეთის არმია დანებდა რუსეთის მხედრობას, რომელიც პირდაპირ ჩავიდა იდრიანობოლში. რუსთა მოწინავე ჯარების ატრიალებმა უკვე დაინახეს ძველი აიასოფის გათქმული ტაძრის გუმბათები... რომ ამ დროს ბოსფორის ლურჯ ზვირთებში საბედისწეროთ გაჩდა ოთხი უშველებელი სამხედრო ჯავშნიანი გემი დიდი ბრიტანიისა და... რუსეთის არმიებიც იმ წამსვე შეჩერდნ... იქვე სანსტეფანოში, რომელიც კონსტანტინეპოლს ათს ვერსზე ახლავს, რუსეთსა და ოსმალეთს შორის შერიგება მოხდა.

გულკეთილი.

(შემდეგა იქნება).





# ომის მაგიანე.

მარტის უკანასკნელმა ორმა კვირამ და-  
ახლოვებით შემდეგი გვიძღვნა: რუსეთ-გერმანიის  
საზღვრებზე ნემანის ნაპირზე, სუვალიკის, პრანსნიშისა,  
გროდნოსა და სხვა მათ ახლო მდებარე მიდამოებში  
წარმოებდა შეტაკებები. მარა, საერთოთ, ამ ორი  
კვირის ოპერაციებს ეტყობა, რომ ეს რაღაც დიდი  
ოპერაციისთვის მზადება უნდა იყოს და მეტი არაფერი.  
სხვა და სხვა სამხედრო მიმომხილველების  
აზრით ამ ორი კვირის გერმანიის ბრძოლა  
რუსებთან დემონსტრაციულია და მოპირდაპირის  
ყურათლების დაბნევის მოსურნე. მართლაც,  
პერემიშლის აღებამ ჰვერი რამ შეცვალა და  
თუ გერმანელებმაც რაიმე სხვა საშვალემა არ  
აღმოაჩინეს რუსების საგრძნობლათ ხელის  
შემშლელი, ეს მათთვის ხელსაყრელი არ  
იქნება კრაკოვის მიდამოებში გერმანელები  
თან და თან აღიდებენ თავის ძალებს და  
კაზილუვკისთანაც დაჯინებით იბრძოდნენ;  
ავსტრო-ჰუნგრეთის საზღვარზე კი სხვას  
გნებდავთ: რამდენათ გერმანელების მოქმედებას  
სამზადისი მოქმედება შეგვიძლია ვუწოდოთ,  
იმდენათ ავსტრიელების მოქმედება სადღეისოა;  
აქ დიდი ამბებია: რუსეთის ჯარი მოკლე  
ხანში კარბატების გადაღახვით და  
ჰუნგრეთის მიდამოებში შესვლით ემუქრება  
ავსტრიას. უკანასკნელს კარგათ ესმის ეს და  
მისი მნიშვნელობა, და ყოველ ღონის ძიებას  
ხმარობდა და ხმარობს რომ რუსების წინ  
სვლა შეასუსტოს და დაბანდოს. აი ამიტომ,  
მან ცადა რუსის ჯარის წვერებზე მედგარი  
იერიშების მიტანით და მოვლით გაეტყუებია  
უჟოკისა და მეზოლაბორჩის მიდამოებიდან  
რუსის ჯარის ნიწილი აქეთ იქეთ, მარა ვერას  
გახთა; ავსტრიელების ჯარმა გადალახა  
დნესტრი, რუსების საზღვრი და შევიდა  
ხოტინში, მარა ამ ოპერაციას მხოლოთ მაშინ  
ექნება მნიშვნელობა, თუ ავსტრიელებმა  
შეძლეს აქ იმდენი უნარის გამოჩენა,  
რომ კიევ-ლეოვის რკინის გზა; ე. ი. მაგისტრალური  
საკვები გზა მოჭრეს, და თუ ეს ვერ  
მოახერხეს, მაშინ მათი მოქმედება თავის  
თავს ვერ გაამარბილებს. უფრო საფიქრალია,  
რომ აქ უბრალო დემონსტრაციაა.

კრაკოვთანაც ცადეს ავსტრიელებმა ჯარის  
შეჯგუფება, მარა ჯერ ღირსშესანიშნავი

არა ყოფილა რა. ცენტრში კი რუსები, როგორც  
ზევით ნათქვამია. წინ წინ მიდიან. ვნახოთ  
შემდეგში რა იქნება.

ინგლისისა და საფრანგეთის წინააღმდეგ  
გერმანიის მოქმედება რაიმე დიდი საქმით არ  
აღბეჭდილა, თუ არ მივლით მხედველობაში  
იმას, რომ ინგლისის რამოდენიმე გემი სხვა  
და სხვა ადგილს წყალში აფეთქდა გერმანიის  
წყალქვეშა ნაგებისა და ნალმების მოწყალებით.

საფრანგეთში გერმანელები წინანდებულ-  
რათ მოქმედობენ ნიუპორსა, შამპანში, ბოსე-  
ჟურაში და მათ მიდამოებში. ინგლისიც და  
გერმანიაც გაზაფხულის მოლოდინში ორივე  
დიდ მზადებაშია; სჩანს აქეთ დიდ ამბებს უნ-  
და ველოდეთ; რას — მომავალი გვაჩვენებს.

დარდნელთან თანდათან გამოირკვა, რომ  
არც ისე ადვილი ყოფილა საქმე, როგორც  
ფიქრობდენ და დიდი დესანტის ვალუსმართ  
მიზნის მიღწევა შეუძლებლათ ცვენეს; ამით აი-  
ხსნება, ის რომ ამ ბოლო დროს ინგლისმა და  
საფრანგეთმა შეასუსტა დარდნელთან მოქმე-  
დება: ირკვევა ისიც რომ დარდნელის სრუტე  
ბევრათ უკეთ ყოფილა გამაგრებული, ვინემ  
ეს სამთა შეთანხმებას ეგონა. ბოსფორთან  
რუსებმა ოსმალის ფლოტს ნელ-ნელა მარა  
სისტემატიურათ საგრძნობელი ზარალი აჩვენეს,  
მიუხედავათ იმისა, რომ რუსეთის ფლოტი  
შავ ზღვაზე უფრო საფეთრაკო მოვალეობას  
ასრულებს ვიდრე ინგლისისა და საფრანგეთის.

ბულგარეთის „ნეიტრალიზაცია“ ს თანდათან  
ნიღაბი ეხსნება: ბულგარეთი მაინც და მაინც  
აღარ ფარავს თუ ვისკენ არის მისი სული და  
გული: ყოველ ღონეს ხმარობს დაეხმაროს  
ოსმალეებს დარდნელის დაცვაში. არც იტალია  
და რუმინია იქცევიან უფრო გრლწრფე-  
ლათ.

კავკასიის ასწარეზზე, ოფიციაოზის სიტყვით,  
რუსების საქმე კარგათ მიდის: მათ ხელთ  
იგდეს დელიბაბა. არტანუჯი, კარადერბენტი  
და ეშაქ — ეილასი.

ქოროხის მდებარეობაშიც მედგარი იერი-  
შით რუსები წინ-წინ მიიწევიან, სწერენ გა-  
ზეთები.

შორეულ აღმოსავლეთში კვლავ იღრუბ-  
ლება. ამბობენ, ჩინეთსა და იაპონიას შუა კი-  
დევ გაურბენია შავ კატას. ვნახოთ, მომავალი  
რას გვაჩვენებს.

რედაქტორ-გამომცემელი ს. მჭედლაძე.



მიიღება 1915 წ. ჰირველ იანვრიდან ხელის მოწერა სამეცნიერო და სა-  
ლიტერატურო და საპოლიტიკო ჟურნალ

## 'გ ა ნ თ ი ა დ' - ზე,

რომელიც გამოვა ორკვირაში ერთხელ ხომლელის ხელმძღვანე-  
ლობით.

წლიურათ ჟურნალი ეღირება 4 მან. 60 კაპ., ნახევარი წლით 2 მან. 30 კაპ.,  
სამი თვით 1 მან. 15 კაპ., თვიურათ 50 კაპ., თითო ნუმერი აბაზათ.

წლიურ ხელის მომწერლებს ფულის გადახდა ნაწილ-ნაწილათა უშეუძლიათ. ხე-  
ლის მოწერისას 2 მან. 60 კაპ., პირველ აპრილს—1 მან. და პირველ ივ-  
ნისს—1 მან.

ქუთაისში ხელის მოწერა შეიძლება ისიღორე კვიცარიძესთან, თომა მთავრიშვილ-  
თან და ძმ. ოცხელების წიგნის მაღაზიაში, თფილისში წ. კ. გ. საზოგ. მდივანთან,  
ბაქოში, ქართული სკოლის გამგე მეთოდე კაკაბაძესთან, ფოთში კოწია გამყრ  
ლიძესთან, ბათომში სოსიკო მდივანთან, სოხუმში ანთიმოზ ჯუღელთან და კავ-  
კავში თ. იასონ მერაბისძე ლორთქიფანიძესთან.

ფული უნდა გამოიგზავნოს ამ მისამართით: Гор. Кутаисъ. Роману Спиридо-  
новичу Паничава.

ამიერიდან ძ. ჟუთაისში გამოდის ახალი გაზეთი

# „სამშობლო“

გაზეთის ფასი: წლიურათ 8 მ., ნახევარი წლით 5 მ., თვიურათ 4 აბ. ცალკე  
ნუმერი ერთი შაური, დამატებიანი— 7 კ.

ესევე გაზეთი დაურიგდებათ „იმერეთის“ ხელის მომწერლებს.

გთხოვთ წერილები და ფული გზავნოთ შემდეგის ადრესით: ქუთაისი, რედაქცია  
„სამშობლო“, თფილისის ქუჩა, სახლი პ. ი. გოკიელისა.

გაზეთს ყოველ კვირა ექნება ნახატებიანი დამატება, დამატების გამოცემა დამო-  
კიდებულია თანამგრძობთა რიცხვის გამრავლებაზე.

ვთხოვთ ომში დაჭრილთა და მოკლულთა ნათესავ-მეგობრებს მოგვაწოდონ მათი  
პორტრეტები.

ვთხოვთ აგრეთვე ადგილობრივ დაწესებულებას და საზოგადო მოღვაწეებს გვი-  
გზავნონ პორტრეტები.

მოწვეულნი არიან ცნობილნი და საუკეთესო მწერალ-თანამშრომელნი. მათი სია  
ამ დღეებში გამოქვეყნდება.

რედაქტორი ი. თ. ცინცაძე.